


# KAMINYOON UG PANAGBULAG

 Iduko nato ang atong mga ulo karon sa makadiyut alang sa pag-ampo. Labing Maloloy-on nga Amahan, ginapasalamat Ka namo niining buntaga tungod niining pribilihiyo nga maania dinhi niining awditoryum, nga ginaatubang ang pagadangatan sa niining adlaw. Apan wala kami masayod kung unsay gikatagana karong adlaw, pero nasayod kami kung Kinsa ang nagakupot niining adlaw. Busa ginaampo namo nga Siya Nga nagakupot sa karon ug sa ugma, ug sa tibuok Eternidad, panalanginan unta kami karong adlawa samtang nagkatigum kami diha sa Iyang Ngalan, aron nga mas masayran namo kung unsaon sa pagkinabuhi aron alagaran Siya. Kini ang bug-os namong tinguha, Amahan. Ang Dios, Nga nasayod sa among mga kasingkasing, nasayod usab nga tinuod kini. Ginatugyan namo ang among mga kaugalingon nganha Kanimo, uban ang—ang nahibilin nga bahin niining adlaw, alang sa Imong buluhaton, sa Ngalan ni Jesus Cristo. Amen.

<sup>2</sup> Makalingkod na kamo. (Salamat. Ania ang usa pa dinhi.)

<sup>3</sup> Maayong buntag, sa mga tigpaminaw nga ania dinhi ug usab sa dili-makita nga mga tigpaminaw sa tibuok nasud nga nakakonekta kanato niining buntaga. Nagahatag kini kanako og dakung pribilihiyo nga makaanhi ug mamulong karong buntaga mahitungod niining importante nga hilisgotanan. Para sa mga tigpaminaw nga ania dinhi, medyo makalibog gayud, tungod kay sa atubangan ko mismo aduna man gud og mga tabil, mao nga kinahanglan kong magsulti nganha sa tuo ug nganha sa wala nga bahin. Ug para sa dili-makita nga mga tigpaminaw, anaa sa akong tuo ang awditoryum, ug usab anaa sa akong wala ang gymnasium; ug anaa ako sa entablado, nga nakaabli ang mga tabil sa tunga-tunga, sa tuo ko nga bahin ug wala nga bahin. Ug nagkadasok kita, niining buntaga, sa tibuok awditoryum, sa gymnasium usab, ug sa iglesia usab, sa iglesia didto sa Eighth ug Penn Street. Ug sa mga lugar nga napuno na og mga tawo, ginapasibya kini pinaagi sa linya sa telepono ngadto sa uban pang mga lugar.

<sup>4</sup> Nagkaaduna kita og maanindot kaayo nga kahigayonan diha sa Ginoo, ug nagahinam-hinam gayud kita para niining panerbisyo karong buntaga. Ug unyang gabii ingon nga pagtapos na sa niining upat ka adlaw nga buluhaton, aba, ginadapit gayud nato ang tanan, nga makatambong, dinhi. Nagasalig kita nga hatagan kita sa Ginoo og mahimayaong sangkoanan unyang gabii pinaagi sa pagbuhat og talagsaon gayud nga butang, nga tungod niana ayohon Niya ang tanang mga may sakit ug buhaton ang dagkung mga butang nga kanunay na Niyang

ginabuhat. Ug nagahinam-hinam gayud kita para unyang gabii. Kinasingkasing nga gidapit ang kadaghanan, ang tanan, ang matag iglesia sa matag denominasyon. Dili gani kinahanglan kon kamo ba'y Cristohanon; ginadapit mismo namo ang mga makasasala nga motabong, og makigtigum uban kanamo. Ug buhaton namo ang labing maayo nga among mahimo aron tudloan sila kung unsa ang pamaagi sa Ginoo, aron kita mabuhi.

<sup>5</sup> Karon nagalaum ko nga dili unta nerbiyoson ang mga tigpaminaw. Ug nagasalig ko sa Dios nga dili pud unta ako nerbiyoson, tungod kay nagkaaduna ako og hilabihan nga gabii, og daghang mga kabug-aton. Kay naamgo ko nga ang mga butang nga akong isulti niining buntaga tulubagon ko man didto sa Adlaw sa Paghukom, ug ako—dili ako makatulog, ug nasayod pud ko nga kung dili ko isulti ang mga niini nan tulubagon ko kini sa Adlaw sa Paghukom. Busa malisud kaayo, dili mo kini maisaysay.

<sup>6</sup> Ug karon niining buntaga atong hisgotan kining dakung hilisgotanan mahitungod sa *Kaminyoon Ug Panagbulag*. Ug ang hinungdan nga gihimo ko kini nga Sunday school, aron nga mahisgotan gyud nato kini ug makagahin ta og oras niini, kaysa nga magwali mahitungod niini. Usa man gud kini ka pagtudlo gikan sa Kasulatan.

<sup>7</sup> Ug ako—gusto kong isulti nga, kung aduna ma'y ministro o mga ministro, sa bisan asa nga dapit, kung mahiadto man kanila kini nga teyp, kung ipagawas na nato kini nga teyp. . . Wala ako mahibalo kung unsay buhaton sa iglesia mahitungod niini. Ginahangyo ko si Igsoong Fred nga makigkita 'una sa hunta sa iglesia sa dili pa niya ipagawas kining maong teyp. Ug kaninyo nga mga tawo sa tibuok nasud, nga adunay mga teyp rekorder, palihog ayaw 'usa ninyo ipagawas ang teyp gawas kung nakabalita na kamo gikan kang Igsoong Sothmann mahitungod niini.

<sup>8</sup> Karon, ug kung mapagawas man gyud kini, ug kon aduna man sa mga igsoon kong ministro, o si kinsa mang Cristohanon sa bisan asa, nga dili mouyon sa mga butang nga akong ginasulti mahitungod niini nga hilisgotanan, ako—nagasalig ko nga dili n'yo unta Kini sawayon. Kung dili n'yo Kini masabtan sa akong paagi sa pagtudlo Niini, bueno, aduna man mo'y katungod niana, ingon nga usa ka ministro, ingon nga usa ka magbalantay. Ug ginarespeto ko ang unsa mang butang nga inyong ginatoohan.

<sup>9</sup> Ug adunay duha ka dagkung opinyon mahitungod niini. Ug kung adunay duha ka pangutana, siguradong may usa kanila ang husto, o wala ni usa kanila ang husto. Busa paningkamotan natong susihon ang Pulong sa Dios, niining buntaga, aron maihan-ay kini. Para kanako, kung usa kini ka pangutana sa Biblia, nan siguradong adunay tubag niini ang Biblia.

<sup>10</sup> Ug karon sa dili pa nato hisgotan ang mga niini, sugdan kini nga hilisgotanan, diay, sa dili pa ako mag-ampo alang sa Pulong, gusto ko nga ipahayag sa matag usa kaninyo, nga ako . . . ilabina kaninyo nga mga Cristohanon, nga ginatinguha ko . . . ako—gusto ko nga iampo ninyo ako niining buntaga. Ug ang tanan diha sa dili-makita nga mga tigpaminaw nga nagapaminaw karong buntaga, iampo n'yo ako, tungod kay gusto ko gayud nga magmatinuuron ug magmatinud-anon.

<sup>11</sup> Karon nasayod kita, nga sa paghimo ko niini nga mga pamahayag, mahimong may usa ka tawo, usa ka tawo, ang manghawid Niini nga mora na Kini og tali sa kinabuhi ug kamatayon. Daghan kaninyo dinhi ang manghawa nga manapanoo. Siyempre, daghan pud kaninyo, tingali, ang dili motoo. Apan nasayod ko, nga sa akong ministerio, aduna gyuy mga tawo nga nagatambong aron maminaw kanako, ug maminaw sa kung unsay akong igasulti; gikan sa, bueno, nagalingkod sila dinhi mismo karong buntaga, sa tibuok kalibutan, gikan sa daghang mga bahin sa Estados Unidos, Canada, ug sa ubang nasud. Ug mahunahuna mo ang kabug-aton nga anaa kanimo, ang mahibaloan nga ang Eternal nga kapaingnan niana nga tawo anaa sa imong mga kamot, tungod kay manghawid man siya sa kung unsay imong ginasulti. Busa papanubagon ako sa Dios tungod niini, ug mao nga gusto kong hisgotan kini sa ingon ka matinuuron gayud kutob sa akong mahimo.

<sup>12</sup> Karon ako—nagahangyo ako sa atong mga igsoong babaye. Ug giusab ko ang pipila sa akong mga pulong aron nga maisulti ko kini sa ilang atubangan. Anaa sa bulsa ni Billy, niining buntaga, dinha, ang pipila ka mga butang nga dili ko mahimong isulti atubangan sa—sa nagkasagol nga tumatambong. Ug ang pipila sa akong ipanulti tingali, kinahanglan n'yo na lang nga sabton. Dawata n'yo kini ingon nga gikan sa—gikan sa inyong igsoon, sa pinakamaayo nga nahibaloan ko. Mahimong molingkod ka sa opisina sa usa ka doktor ug maminaw kaniya, og kinahanglan niyang mosulti kanimo sa klaro kaayo nga mga pulong. Ug ang pipila kaninyo nga mga batan-ong babaye ug mga batan-ong lalaki, ayaw ko nga magkaaduna kamo og sayup nga panghunahuna. Gusto ko nga motoo kamo, ug magpabilin lang sa paglingkod. Hinumdumi, ang Kamatuoran kinahanglan nga maipahayag gayud ingon nga Kamatuoran.

<sup>13</sup> Ug, karon, walay pagduhaduha nga daghan kaninyo ang dili mouyon sa kung unsay igasulti, apan gusto kong pamatud-an kini kaninyo pinaagi sa Biblia. Ug dayon nagatoo ko, nga kung magmatinahuron lang mo ug maminaw, nan magkaaduna kamo og mas maayo nga pagsabot ug panghunahuna mahitungod sa kung unsa ang dugay ko nang ginasaway, sa una pa. Nagatoo ko nga magahatag kini og katin-awan, ug nagasalig ko nga mamaingon niana gayud.

14 Bueno tingali'g medyo madugay kita, usa ka oras ug tunga, o tingali'g mas dugay pa, mahitungod niini. Wala ko kabalo kung unsa ka dugay kini.

15 Ug karon usab, gusto kong isulti nga, niining orasa, ingon nga, nanghibalo nga manghawid gyud ang mga tawo sa imong mga pulong; ingon niana mismo sila, ngadto sa ilang pastor. Ug, siyempre, dugay na akong usa ka pastor.

16 Ug nagapanghawid sila sa mga pulong sa usa ka pastor, nga mora na kana og tali sa kamatayon ug kinabuhi. Nagapanghawid sila sa mga pulong sa ilang pari, nga mora na kana og tali sa kamatayon ug kinabuhi. Ug siyempre, ang pastor, tingali'g sa tanan nga nahibaloan niya nga buhaton, ginatudloan niya ang iyang mga tawo sa ingon ka eksakto gayud sama sa gikatudlo kaniya sa seminaryo; walay pagduhaduha nga ingon niana usab ang pari, sa nagkalainlaing mga relihiyon nga adunay mga pari. Siyempre, ang pastor sa tinuod lang usa man ka pari; usa siya ka tigpangaliya. Busa, kung ang pari, sa tanan nga gikatudlo kaniya sa iyang, seminaryo ug sa mga monasteryo, ang maong tawo sa halawum niyang pagkasinero ginasulti lang sa ingon ka eksakto kung unsay gikatudlo kaniya.

17 Bueno, kung ingon-ana, wala man ko'y bisan unsa nga pang-seminaryong kasinatian o pang-monasteryo nga kasinatian, ug wala man ko'y bisan unsa nga batok niana, apan aduna lang ko'y talagsaon nga kinabuhi.

18 Gitawag ako kaniadtong usa pa lang ko ka batang lalaki. Ug usa kadto ka makita, og madungog nga ilhanan ang gikahatag kanako, usa—usa ka Haliging Kalayo nga atua sa sapinit, sa edad nga siete anyos, dinhi mismo sa Utica Pike. Nagatrabaho kaniadto ang akong amahan para kang Mr. O. H. Wathen nga bag-ohay lang namatay. Ug nabasa n'yo na ang basahon, og kabalo na mo sa maong estorya. Ug sukad niadtong panahona . . . Didto sa suba kaniadto mitungha Kini sa atubangan sa mga tawo. Ug dayon nakudakan mismo ang hulagway Niini, sa makadaghang higayon, ug nakasab-it kini didto sa Washington, DC, ingon nga usa ka copyright, sa Religious Hall of Art, ingon nga mao'y bugtong supernatural nga Persona nga gipamatud-an sa siyensiya nga nakuhaan og retrato sukad-sukad; ang mao nga Haliging Kalayo, eksaktong pareho ra ang porma ug tanan na, nga mao'y nagdala sa Israel pagawas sa Egipto kaniadto. Nagatoo ko nga si Jesus Cristo Kini sa porma nga Espiritu, diha sa pagka-Anak sa Dios.

19 Tungod gitawag man Siya nga “Anak sa tawo” sa kaniadtong una Niya nga pag-anhi, karon gitawag na Siya nga “Anak sa Dios,” diha sa Milenyum Siya'y mamahimong “Anak ni David.” Mianhi Siya ingon nga Anak sa tawo, usa ka Propeta, sumala sa gikasulti na mahitungod Kaniya; karon Siya'y Anak sa Dios, sa supernatural; pag-diha na sa mahimayaong

Milenyum nga moabot, Siya'y mamahimong Anak ni David, nga magalingkod sa trono ni David. Sumala sa nahibaloan sa tanang mga nagabasa sa Biblia nga usa kana ka Balaanong saad sa Dios, ngadto kang David, nga pagapatindogon Niya ang iyang Anak aron molingkod sa iyang trono.

<sup>20</sup> Ug karon diha sa usa ka lahi, og talagsaon nga ministerio, gibansagan na ko og bisan unsa na lang gikan sa pagka "Dios" ngadto sa "usa ka yawa." Ug kana, kanunay na kanang ingon niana.

<sup>21</sup> Ingon niini ang gisulti kanako sa arsobispo sa iglesiang Katoliko niadtong miaging gabii didto, ang nahisgotan mao nga, miingon siya, "Igsoong Branham, klaro nga gipaila ni Juan Bautista ang iyang kaugalingon diha sa mga Kasulatan, sumala sa gikasulti ni propeta Isaias." Ingon siya, "Ang imong ministerio klaro man usab nga gipaila diha sa Iglesia." Ingon siya, "Ang mga Lutheran anaa sa Biblia." Ingon siya, "Ang mga Lutheran nakaila kang Luther. Ang mga iya ni Wesley nakaila pud kang Wesley. Apan unsa man ang mga Pentecostal?" Ingon pa, "Nagalatagaw sila. Wala sila kahibalo kon asa sila paadto."

Ug ingon ko, "Sir, ginapasalamatan ko kana."

<sup>22</sup> Ug niadtong tungora mismo mikunsad ang Espiritu ngadto sa usa ka babaye, wala pa ko niya nakita sukad-sukad, ang iyang asawa . . . ug nanulti ug naila ang mao ra nga mga butang.

<sup>23</sup> Karon, sa tinuod lang, sa dili pa ako maghisgot niining Mensahe karong buntaga, wala ako mahibalo. Giingnan ko siya, ingon ko, "Sir, dili ko makasulti niana. Usa kana ka dakung butang para isulti. Mora'g ingon niana gyud."

<sup>24</sup> Usa ka butang lang ang nahibaloan ko, nga aduna gyu'y magakahitabo, sigurado gayud. Ang tanan niining mga butanga, nga, napamatud-an mismo sa siyensiya, ug napamatud-an na sa tibuok kalibutan, dili kini mamahimong usa ka tinumotumo lang. Kamatuoran Kini. Unsa man kini? Tugoti ko sa pagsulti, ingon nga pagsugid, sa dili pa ako mamulong kaninyo niining buntaga, nga wala ako mahibalo. Ug dili ako mangahas sa pagbuhat og bisan unsa hangtud nga aduna ko'y madungog gikan Kaniya nga sa kaniadto pa nakigsulti na kanako ug nagasulti kanako niining mga butanga.

<sup>25</sup> Hinumdumi n'yo, nga wala gipaila sa atong Ginoong Jesus Cristo ang Iyang Kaugalingon ingon nga Anak sa Dios. Miingon Siya, "Gipamulong mo nga Ako mao; tungod niini Ako nagpakatawo," ug uban pa, apan wala gayud Niya gipaila ang Iyang Kaugalingon.

<sup>26</sup> Ug, karon, ang Haliging Kalayo nga nanguna kaniadto sa mga anak sa Israel, mao si Ginoong Jesus Cristo diha sa porma nga Espiritu, (nagatoo ba mo niana?), ang Logos nga migula gikan sa Dios.

27 Ug dayon kaniadtong ania pa Siya sa yuta, miingon Siya, “Gikan Ako sa Dios, ug mobalik Ako ngadto sa Dios.” Nasayod na kitang tanan niana.

28 Ug human sa Iyang pagkamatay, paglubong, ug pagkabanhaw: si Saulo nga taga-Tarsus atua sa iyang dalan kaniadto paingon sa Damascus, aron lutoson ang—ang mga Cristohanon, tungod kay nagapanudlo man sila og mga butang nga sukwahi sa kung unsay gikatudlo kanila. Ug usa siya ka bantugan nga manggugubat; ilalum ni Gamaliel, nga usa sa mga dunganon nga magtutudlo sa niadtong panahon, sa ilang tulonghaan, sa ilang monasteryo; ug usa ka bantugang tawo, ug usa ka opisyal sa iglesia. Ug didto kaniadto ang dakung Kahayag, ang Haliging Kalayo na usab, nga miigo kaniya ug natumba siya, udtong tutok kaniadto. Ug miingon ang usa ka Tingog, “Saulo, Saulo, nganong ginalutos mo Ako?”

29 Karon kung inyong matikdan sa diha nga si Pablo, si Saulo, mibangon, ingon niya, “Ginoo, Kinsa ba Ikaw?” Bueno, kana nga lalaki, ingon nga usa ka Judio, siguradong dili gyud niya tawgon og ingon niana ang bisan unsa man, gawas kung usa kini ka butang nga nagasimbolo sa Dios, wala niya unta gitawag kadto nga “Ginoo.” Busa, mao Kadto ang mismong Haliging Kalayo.

30 Sumala sa gisulti ni Jesus, “Moadto Ako sa Dios. Gikan Ako sa Dios, ug mobalik Ako ngadto sa Dios.”

31 Atua Siya, nga nakabalik na sa porma sa usa ka Haliging Kalayo; miingon Siya, “Ako mao si Jesus Nga ginalutos mo; ug malisud kanimo ang pagtindak sa mga espuela.”

32 Ug nahibaloan usab nato nga si Apostol Pedro, kang kinsa gikahatag ang mga yawi aron sa pagtukod sa Iglesia, hingsayran nato nga siya gibilanggo kaniadto, ug kining mao ra nga Haliging Kalayo milusot sa mga rehas, giablihan ang mga pultahan sa bilanggoan, ug gipahigawas si Pedro, sa ingon ka mysteryoso, nga wala man lang nadisturbo ang tigbantay. Para kanako, si Jesus Cristo Kadto nga mao sa gihapon kagahapon, karon, ug hangtud sa kahangturan.

33 Ug kung ingon-ana kanunay n’yong maila ang unsa mang butang pinaagi sa kinaiyahan niini. Maila ang unsa mang butang pinaagi sa kinaiyahan niini, sa bunga nga ginapamunga niini. Ug ginahangyo ko kamo nga matikdan ang matang sa bunga nga ginapamunga Niini, kining Kahayag nga mao ang Dios, tungod kay kanunay man Kining nagabalik ngadto sa Pulong sa Dios, ug ginapamatud-an ang Pulong sa Dios, ginawali ang Pulong sa Dios, ug ginapamatud-an mismo sa Dios ang Pulong sa ingon ka tataw sa inyong atubangan. Siguradong aduna gayu’y butang nga nagapaluyo Niini.

34 Ginatawag ako sa mga tawo nga usa ka propeta. Wala ko man ginatawag ang akong kaugalingon ingon nga usa ka propeta, tungod kay dili gyud ako mangahas nga mosulti og ingon-

ana, apan aduna ako'y...Hinoon, masulti ko ang ingon-ini, nga gitugotan ako sa Ginoo nga makita nang daan ang mga butang, masulti ang mga butang nga nanghitabo na, mahitabo pa, og nagakahitabo, ug wala gyud ni usa ka higayon nga napakyas kini, sa napulo ka linibo ka pilo. Ang tanan-tanan nga gisulti Niya nga mahitabo, nahitabo gayud. Nasayod kitang tanan niana. Kung aduna ma'y usa ka tawo sa mga tigpaminaw nga ania dinhi niining buntaga, o asa man, ang makasulti nga napakyas kini og usa ka higayon, gawasnon kamo nga mobarug ug isulti kana. Apan kung nasayod man ang tanan nga sa matag higayon, sa linibo ka pilo, nga kini'y ingon gayud ka eksakto, moingon og, "amen." [Nagaingon ang kongregasyon, "Amen!"—Ed.] Kita n'yo? Busa mao gihapon kana sa tibuok kalibutan.

<sup>35</sup> Aduna gayu'y butang nga duol nang mahitabo. Wala ginapadala sa Dios kining mga butanga nga walay katuyoan sa luyo niini.

<sup>36</sup> Gihunahuna ko lang dinhi. Gibutang ko kini dinhi, sa usa sa akong mga sinulat. Nga sul-ob ko niining buntaga, ang usa ka pares nga hemelo... Ug daghan kaninyo ang nakadungog na bahin niining artista, nga si Jane Russell, ug ang iyang inahan usa ka Pentecostal; ug ig-agaw niya si Danny Henry, iyang ig-agaw ig-tagsa, anak sa igsoong babaye sa iyang inahan. Usa siya ka Baptist. Nakatambong siya kaniadto sa panagtigum, usa ka panagtigum sa Business Men sa Los Angeles, California, duha ka tuig na ang milabay.

<sup>37</sup> Ug bag-o ra kong nahuman niadto og wali ingon sa usa ka halangdon, gamhanan, makusganon nga mga pahayag, nga bisan ang tigdumala, ang usa sa pangkinatibuk-an nga mga tigdumala sa Assemblies of God, mikanaug paingon sa entablado gikan sa balkonahe kon diin siya nagalingkod niadto, ug miingon siya, "Wala ko nagatoo nga ingon niana ang buut ipasabot ni Igsoong Branham."

<sup>38</sup> Miingon ko, "Ingon niadto mismo ang buut kong ipasabot, sir. Kini ang MAO KINI ANG GINAINGON SA GINOO." Ug, kadto'y, mahitungod kadto sa iglesia sa niini nga kapanahonan.

<sup>39</sup> Ug niadtong mga orasa, kining batan-ong lalaki nga usa ka negosyante... Ang iyang igsoon atua sa... atua kini didto nga nagakuha og mga retrato para sa telebisyon niadtong buntaga, ang usa pa niya ka igsoon mao'y—mao'y tigdumala sa dalan sa estado sa California. Ug miduol si Danny Henry human nga natapos na ang panagtigum, didto sa entablado, nga sama *niini*, kon diin nagalingkod ang mga kalalaken-an, miduol siya aron agbayan ako. Ug gisulti niya kini nga mga pulong, "Igsoong Branham, dili unta kini medyo panamastamas, apan," miingon, "mahimo na kana nga ika-23 nga kapitulo sa Pinadayag." Diin, aduna lang ma'y baynte-dos ka kapitulo sa Pinadayag. Ingon

siya, “Dili unta kini medyo panamastamas.” Pagkasulti niya niadto. . . Bueno, ang maong lalaki usa ka Baptist, ug walay unsa man nga hingsayran mahitungod sa supernatural. Samtang nag-agbay siya kanako, misugod na siya sa pagsulti og dili-mailhan nga pinulongan.

<sup>40</sup> Ug sa nahuman na siya sa pagsulti og dili-mailhan nga pinulongan, dunay usa—usa ka medyo tambokon, itum nga babaye nga nagalingkod sa atubangan ko mismo, mitindog siya, nga miingon, “Wala na kana nagkinahanglan og bisan unsa nga paghubad.” Ingon siya, “Ako’y taga-Shreveport, Louisiana, o, Baton Rouge, Louisiana.” Miingon, “Klaro na kana nga Pranses.”

<sup>41</sup> Si Victor Le Doux, nga usa ka Pranses, nagalingkod usab didto, og miingon, “Mao gayud, usa ako ka Pranses, ug kana’y eksakto gayud nga Pranses.”

<sup>42</sup> Ingon ko, “Kadali lang. Isulat *mo* kung unsay iyang gisulti, ug isulat *mo* usab kung unsay iyang gisulti, ayha *mo* mosulti og unsa man. Isulat ninyo ang inyong ginasulti, ug tan-awon nato ang inyong mga sinulat.” Ug busa misulat ang usa, ug misulat pud ang usa pa, bisan ang panulbok gani magkapareho gayud.

<sup>43</sup> Ug pagkahuman niadtong mga orasa usab, sa dihang gidala na nila ang maong mga sinulat, dunay usa ka ambonga’ng, batan-ong lalaki nga bulagaw og buhok ang miduol gikan sa luyo. Tungod, wala na ma’y igong espasyo kaniadto aron makalingkod siya; nagtindog na lang siya didto sa luyo. Miduol siya, miingon, “Kadali lang, gusto ko nga maghatag og sinulat, usab.” Ingon siya, “Ako mao ang maghuhubad sa Pranses para sa U.N., United Nations.” Ingon siya, “Gusto kong ihatag usab ang akong sinulat.”

<sup>44</sup> Ug, ania, ang maong tulo ka sinulat magkapareho gayud, nga Pranses. Ug ingon niini ang pagbasa niini. Mao kini ang orihinal nga mga sinulat nga naisulat, nga naisulat mismo. Mao kini ang sinulat ni Danny, mismo, nga gisulod niya sa iyang bulsa. Siyempre, miabot na pud kini sa Christian Business Men, ug sa uban pa.

*Tungod kay gipili mo ang mahiktin nga dalan, ang mas lisod nga dalan, milakaw ka sa kaugalingon mong pagpili, Gipili mo ang husto ug tukma nga desisyon, ug mao kini ang AKONG DALAN.*

*Tungod niining mahinungdanon nga desisyon, magahulat kanimo ang daku nga bahin sa Langit. Daw sa unsa ka mahimayaong pagdesisyon ang gihimo mo!*

*Kini, mismo, mao ang magahatag, ug magpahitabo, sa daku kaayong kadaugan diha sa Balaanong Gugma.*

<sup>45</sup> Bueno, gisulat sa maong lalaki ang iyang ngalan dinhi, “Ang pahayag nga anaa sa itaas gihubad ni. . . sa pagpropesiya ni



Danny Henry mahitungod kang Igsoong Branham, nga gihatag sa tulo ka saksi didto sa cafeteria sa Los Angeles, California.”

<sup>46</sup> Karon, kining mao gihapong batan-ong lalaki nga nagpropesiya niini, nga wala nanghibalo kaniadto kung unsay iyang ginasulti, miadto siya sa Jerusalem mga usa ka bulan na ang milabay. Aduna man siya’y pribilihiyo nga makaadto didto ug—ug makahigda sa lubnganan kon diin namatay si Jesus ug gilubong. Ug busa samtang nagahigda siya didto, ingon siya nga nahunahunaan kono ko niya ug misugod siya sa paghilak. Miingon, “Pagkalisud gayud diay para kang Igsoong Branham nga mobarug batok sa kalibutan ug sa ingon niining mga butang, ug batok sa tanang mga iglesia!”

<sup>47</sup> Sama sa—sa gisulti sa usa ka tawo kaniadto, bahin kang Billy Graham, ang ingon, “Masabtan nato si Billy Graham, tungod kay nagkahiusa man ang tanang mga iglesia para kaniya. Masabtan nato si Oral Roberts, tungod sa mga Pentecostal. Apan unsaon man nato sa pagpahigayon og unsa mang butang, kon sukwahi Kini sa kung unsay gikatudlo na sa mga tawo?” Ang Dios kini.

<sup>48</sup> Ug, si Danny, ang ginabuhat niya ingon nga kalingawan, nagabuhat siya og gagmay’ng mga bato. Miadto siya sa kon diin didto giugbok ang Krus, diin ginaingon nila nga giugbok kono ang Krus kaniadto sa bato. Walay si kinsa man ang atua sa palibot, busa nagtiltil siya og usa ka gamay’ng bahin sa bato ug gisulod niya kadto sa iyang bulsa ingon nga usa ka handumanan, miuli siya ug gihimoan ako og usa ka pares nga hemelo gikan niadto. Ug, talagsaon kaayo, nga sa paghimo niya og mga hemelo, mora kadto og dunay mansa sa dugo. Ug sa matag usa mismo niadto, dihay badlis, nga tul-id, mahiktin nga badlis diha mismo sa duha ka hemelo. Karon tingali’g usa lamang kana ka . . . Kita n’yo, tingali’g dili kini mamatikdan sa uban, apan para kanako uyon kini sa mga butang nga akong ginatooan. Nagatoo ko nga ang tanang butang aduna gyu’y kahulogan.

<sup>49</sup> Ug karon, niining higayona, unsa man ang anaa sa Ginoo . . . Kung dili man kini ang butang nga Iyang gipropesiya, mahitungod sa Malaquias 4 ug mahitungod usab sa Lucas 17, ug daghan pang uban nga mga Kasulatan nga mamahitabo sa niining kaulahiing adlaw, buut kong isulti kini sa pagtapos, nga nagpahimutang sa gihapon kini og pundasyon alang sa maong tawo pagmoabot na siya. Busa mapasalamatong gayud ako nga ang Dios nga Makagagahum-sa-tanan, kung ingon niana man kini, gitugotan ako nga mobuhat og usa ka gamay’ng butang, sa akong pagkawalay-edukasyon, aron ipakita ang akong pagpasalamat sa Iyang gugma para kanako, ang akong gugma alang Kaniya, ug ang atong gugma para sa mga tawo.

<sup>50</sup> Busa, sa pagkamatinuuron nga paagi, pagahisgotan ko kining hilisgotanan mahitungod sa *Kaminyoon Ug Panagbulag*. Kaloy-an unta kitang tanan sa Dios.

<sup>51</sup> Ug karon paminaw mo og ayo. Ug, mga igsoong babaye, ayaw baya mo pagtindog ug manggawas; pabilin lang mo sa paglingkod sa makadiyut. Mga igsoong lalaki, kamo usab. Ayaw n'yo palonga ang inyong mga himan dinha, nga nakakonekta niini nga pagsibya. Ayaw n'yo buhata kana. Pabilin lang mo sa paglingkod sa pipila ka minuto, hangtud nga mahuman kini. Paminaw og ayo. Kung dili kamo mouyon, isulat n'yo ang mga Kasulatan nga akong gigamit, ug dayon tun-i n'yo ang mga Niini nga may pag-ampo sa dili pa kamo mohimo og desisyon.

Dios, tabangi kami samtang ginapaningkamotan namong hisgotan kini nga hilisgotanan.

<sup>52</sup> Karon, tingali'g medyo madugay-dugay kini. Ayaw ko man gud nga magdali kamo. Ug ayaw lang mo pagdali, kitang tanan, ug tun-an nato ang Pulong sa Dios, nga matinud-anon ug bug-os gayud, sama sa atong hingsayran kung unsaon sa pagtuon Niini.

<sup>53</sup> Sugdan nato sa San Mateo, sa ika-19 nga kapitulo. Ug magsugod, siguro, sa ika-8 nga bersekulo sa ika-19 nga kapitulo, gusto kong magsugod dinha. Magsugod usab tingali ako sa ika-1, ug basahon paubos hangtud sa ika-8 nga bersekulo sa ika-19 nga kapitulo.

<sup>54</sup> Karon, hinumdumi n'yo, kining mga butang nga akong ginasulti kinahanglan nga magagikan sa Pulong sa Dios. Dili kini puede nga sa kaugalingon ko lang nga opinyon, tungod kay ang opinyon ko sama lang usab sa opinyon ni kinsa pa man. Kondili kinahanglan nga nagakatakdo kini kanunay sa Pulong sa Dios. Hinumdumi, kanunay nga ginapatakdo sa Dios ang tanang butang. Dili Siya nagakausab. Siya mao sa gihapon kagahapon, karon, ug hangtud sa kahangturan. Nagatoo ba mo niana? Siya mao sa gihapon.

<sup>55</sup> Karon mobasa na ko gikan sa ika-19 nga kapitulo.

*Ug nahitabo, nga sa nakahuman na si Jesus niining mga pulonga, mipahawa siya sa Galilea, ug miadto sa mga utlanan sa Judea didto dapit sa Jordan;*

*Ug misunod kaniya ang mga dagkung panon sa katawhan; ug sila giayo niya. . .*

*Mingduol usab kaniya ang mga Fariseo, sa pagtintal kaniya, . . .*

<sup>56</sup> Mihunong ako dinha aron nga makuha n'yo ang punto kung kinsa kadtong gipahinungdan nga nagtintal Kaniya.

*. . . nga nagaingon kaniya, Matarung ba sa usa ka lalaki ang pagbiya sa iyang asawa sa bisan unsang hinungdan?*

*Ug siya mitubag ug miingon kanila, Wala ba ninyo hibasahi, nga ang nagbuhat kanila sa sinugdan nagbuhat kanila nga lalaki ug babaye,*

*Ug nag-ingon, Tungod niini nga hinungdan biyaan sa usa ka lalaki ang iyang amahan. . . inahan, ug makighiusa sa iyang asawa: ug silang duha mahimong usa lamang ka lawas?*

*Busa dili na sila duha, kondili usa na lamang ka lawas. Busa ang ghiusa sa Dios, dili pagabulagon sa tawo.*

*Sila miingon kaniya, Nganong nagsugo man lagi si Moises sa paghatag og sulat-pamatuod sa panagbulag, ug . . . sa pagbiya sa asawa?*

*Ug Siya miingon kanila, Tungod sa kagahi sa inyong kasingkasing si Moises nagtugot kaninyo sa pagbiya sa inyong mga asawa: apan sukad sa sinugdan dili mao kini.*

Karon, Dios, tabangi kami.

<sup>57</sup> Kini nga Kasulatan, kini nga pangutana, giatubang na ni Jesus kaniadto sa sugod pa lang sa Iyang ministerio. Ug giatubang na pud kini ni Moises sa sugod pa lang sa iyang ministerio. Usa kini ka pinakaimportante nga pangutana diha sa mga kasingkasing sa mga magtotoo. Wala ma'y diperensya kana sa mga makasasala. Apan para ra kini sa mga magtotoo, tungod kay ginapaningkamotan sa magtotoo nga buhaton ang tanan nga nahibaloan niyang buhaton aron magkinabuhi nga matarung atubangan sa Dios. Busa kini, kon mahisgotan ang unsa mang pangutana mahitungod sa relihiyon, nan mahisgotan usab ang kaso sa *Kaminyoon Ug Panagbulag*. Ngano man? Tungod kay mao kini ang hinungdan sa orihinal nga sala. Dinha nagsugod ang sala. Ug mao kana'y hinungdan nga pirmi kining mahisgotan, tungod kay mao man kini ang pinaka sinugdan sa sala.

<sup>58</sup> Bueno wala na ako'y panahon aron isaysay ang tanan niining mga butang, apan malipay gyud ako nga tubagon ang inyong sulat o unsa man nga mahimo ko. O, aduna man pud kita'y mga basahon nga nahisulat mahitungod niini, ug daghang mga pangutana, ug mga balita usab nga gigunting gikan sa mantalaan ug mga ingon-anang butang dinhi, aron magpamatuod niini, nasayod kita nga si Eva kadto (Tungod sa mansanas kono kadto nga iyang gikaon, nga dili man gani kana uyon sa Kasulatan, karon ginapamahayag nila nga usa kono kadto ka melokoton; wala gyud ni usa niana.), nakapanapaw siya, nga mao'y naghimugso sa unang anak, nga mao si Cain, nga anak mismo ni Satanas, tungod atua man kang Cain ang pagkadautan. Wala ang ingon niana kang Abel. Si Cain mao ang anak ni Satanas.

59 Kabalo ko sa inyong pangutana karon, “Ang ingon man ni Eva, ‘Nakabaton ako og usa ka lalaki gikan sa Ginoo.’” Eksakto gayud kana.

60 Mahimo man ninyo ipananglitan ang pinakadautan nga babaye sa siyudad, ang pinakadautan nga lalaki; kung nakabaton sila og anak, siguradong naggikan kana sa Ginoo, tungod kay nagpahimutang man ang Dios og mga balaod. Ug kini nga mga balaod, maingon sa pagsubang sa adlaw; kon magtanum ka og usa ka amorseko diha sa maayo nga umahan, motubo gyud kana. Ug siguradong motubo kana, tungod kay balaod man kana sa Dios. Sa dihang gitatum na ang binhi, kinahanglan nga motubo kini. Ug walay unsa man nga makapatubo sa kinabuhi kondili ang Dios lang, tungod kay nagalihok man kini ilalum sa Iyang mga balaod. Busa sa diha nga naitanum kaniadto ang dautan nga binhi sa tagoangkan ni—ni Eva, kinahanglan nga maghimugso kadto, tungod kay mao kadto ang balaod sa Dios sa paglalang. Ug wala na kini’y unsa pa man nga mahimo kondili ang maghimugso niini, ug siguradong gikan kini sa Dios.

61 Mao kana’y hinungdan nga ginaingon sa mga tawo, “Ang gagmay’ng mga bata,” usahay kono, “nga wala nahimugso diha sa Cristohanong mga ginikanan, mangalaglag.”

62 Ang Dugo ni Jesus Cristo mao ang nagabayad para sa bata, dili ko igsapayan kung unsa nga paagi ang pagkahimugso niini ug kung unsa ka dautan ang pagkahimugso niini. Siya mao ang Cordero sa Dios nga nagakuha sa sala sa kalibutan. Dili pa makahinulsol ang gamay’ng bata, tungod kay wala pa man siya’y angay’ng hinulsolan, ug mao kadto ang sala sa kalibutan nga gitangtang sa Dugo ni Cristo. Ang mga masuso mahiadto gyud sa Langit.

63 Mao kini ang orihinal nga sala, ug mao kana’y hinungdan nga kini’y—ginasusi kini. Pag-aduna ma’y dakung katingalahan nga nagagikan sa Dios, ang unang butang dayon: “Unsa man ang mahitungod sa kaminyoon ug panagbulag?” Bueno, sukad pa kaniadto, usa gihapon kini ka pangutana sa mga tawo. Sama kaniadto sa panahon ni Jesus, sama kaniadto sa panahon ni Moises, ingon na gyud niana sa una pa, ug hangtud niining adlaw, usa gihapon ka pangutana sa mga tawo, tungod kay gusto man sa mga tawo nga masayran kung unsa ang Kamatuoran.

64 Apan kung adunay pangutana, siguradong aduna usab og tubag. Ug karon ingon nga adunay tubag, sama sa gikasulti ko na sa wala pa, kini nga semana, siguradong aduna gayu’y husto nga tubag. Ug kung makakuha kita og tubag sa unsa mang butang, ug kana—dili kana husto, nan mahibaloan nato nga sayup diay kana. Apan aduna gyu’y hustong tubag, mao nga mangutana ka sa gihapon hangtud nga matubag ang tinuod nga pangutana,

kung gusto mong mahibaloan ang Kamatuoran. Ug ingon nga usa kini ka pangutana sa Biblia, kinahanglan nga tubag pud kini sa Biblia.

<sup>65</sup> Sama ra kini sa gikaingon ko na, kung gusto ko nga moadto sa sidlakan niining buntaga, ug ang pinakamaayo nga nahibaloan ko niini, kinahanglan aduna ko'y makita dinha sa dalan, ug nga diretso kini pa-sidlakan, ug mao nga paingon gyud ko sa sidlakan. Adunay moingon, "Igsoong Branham, mao *kini* ang sidlakan." Sidlakan kana, sa potensyal, apan amihanang-sidlakan man. Masayloan ko lang ang mismong butang nga akong ginapangita; mao nga mobalik ako, sa pagkahibalo nga sayup diay kana. Ug dayon kung aduna na pud og moingon, "Igsoong Branham, adto ka *niini* nga direksyon, sa imong tuo." Karon, sa potensyal sidlakan man, usab kana, apan habagatang-sidlakan pud lagi. Masayloan ko gayud ang maong butang nga akong ginapangita, tungod kay milagpas na man ko sa utlanan sa hingpit ug tukma nga direksyon.

<sup>66</sup> Karon, kung ingon niana man, aduna kita'y duha ka opinyon mahitungod sa *Kaminyoon Ug Panagbulag*. Ug kana mao'y, nagaingon ang usa niini, nga, "Ang usa ka lalaki kono puedeng maminyo sa usa ra ka higayon, gawas lang kon patay na ang iyang asawa." Ug mao kana ang usa sa mga pangutana, apan, pag diretsohon mo kana, molagpas pud ka. Ug dayon nagaingon pud ang usa, "Oh, kung ang asawa o ang bana kono, usa kanila, ang nakapanapaw, nan mahimong biyaan sa usa ang usa niini ug magminyo pag-usab." Makaplagan mo ang imong kaugalingon nga milagpas ka na tungod niana.

<sup>67</sup> Busa, kita n'yo, dili kini habagatang-sidlakan o amihanang-sidlakan man; ang gusto nato nga diretso gyud sa sidlakan. Molagpas ka sa Kasulatan pag mosubay ka *niini* nga direksyon, molagpas pud ka sa Kasulatan pag mosubay ka *niana* nga direksyon. Gusto natong mahibaloan kon diin nagakatakdo ang usa ka Kasulatan ngadto sa usa pa ka Kasulatan, ug hibaloon kung unsa ang Kamatuoran niini. Nagasubay man gud ang matag usa niini ngadto sa managlahi nga direksyon, ug napakyas nga mahatag ang husto nga tubag, apan siguradong aduna gyud sa gihapon og usa ka tubag.

<sup>68</sup> Sama lang kini, karong panahona, nga adunay duha ka bantugang opinyon mahitungod sa doktrina sa iglesia; ang usa niini mao ang Calvinismo, ang usa pa mao ang Armin... Arminianismo. Ang usa niini legalista, ang usa usab nakabasi ra sa grasya. Ug hingsayran nato nga ang mga tawo nga nagatoo sa grasya, ang mga Calvinista, nagaingon sila, "Dalaygon ang Dios, dili man makapadaut kanako ang pagpanigarilyo. Dili man makapadaut kanako ang pag-inom og makahubog. Mahimo ko ra nga buhaton kining mga butanga, aduna na man ako'y Eternal nga kasiguradohan." Dayon hingsayran pud nato sa pikas bahin, diha sa pagka-legalista, miingon, "Oh, gusto ko

siyang badlongon, gusto ko siyang sawayon, apan, usa man ako ka Cristohanon, kinahanglan ko nga magpakahilum.” Kita n’yo, makaplagaan n’yo ang inyong kaugalingon sa duha ka managlahi nga dalan, ug wala ni usa niana ang husto. Karon, malisud nga isulti ang ingon niana, apan mao kana ang kamatuoran.

<sup>69</sup> Makaplagaan nato ang atong mga kaugalingon diha sa duha ka managlahi nga dalan; ang usa, nagapaingon sa usa ka direksyon; ang usa usab, sa lahi nga direksyon. Karon hibaloon nato kung unsa gyud ang Kamatuoran.

<sup>70</sup> Karon paminaw mo, ug matikdi kung makatarunganon ba kining paminawon para kaninyo. Pananglitan, sa pag-andam ko aron moadto sa ubang nasud, ug istoryahon ko ang akong pamilya, tawgon ko ug paduolon ang akong asawa, ug moingon ko, “Kami mo- . . . Moadto ko sa ubang nasud, palangga.” Karon ania ang bahin sa legalista, “Karon, asawa ko, ihan-ay ko ang balaod diha kanimo! Kung magbirig-birig ka gani sa kinsa man nga lalaki samtang wala ako, pag-balik ko usa ka na ka diborsyadong babaye. Ug dili ko gusto nga magtan-aw-tan-aw ka, dili ko gayud gusto nga makigbirig-birig ka! Nakasabot ka ba niana? Imo akong bana! Kung buhaton mo man kana, nan biyaan gyud ta ka pag-balik ko.”

<sup>71</sup> Dayon moduol siya ug hawiran ako sa korbata, ug moingon, “Buutan ko nga bana, aduna pud ko’y gustong isulti kanimo, ha, kita mo, nga kung magtan-aw-tan-aw ka gani sa kinsa man nga babaye, o mogawas uban ang si kinsa mang babaye, o makigbirig-birig sa kinsa mang babaye, nan mamahimo kang usa na ka diborsyadong lalaki pag-balik mo.” Karon, ingon ba niana ang usa ka malipayon nga panimalay? Mao kana ang sa mga legalista. Oo.

<sup>72</sup> Karon, sa pikas bahin usab, nga kung moadto ako sa ubang nasud ug nakahimo ko og sayup . . . Moadto ug moingon, “Karon, tan-awa, mogawas ako uban *niini* nga babaye. Oh, okey ra man sa akong asawa, wala ma’y problema kaniya.” Moingon pud ang akong asawa, “Makigkuyog ko uban *niini* nga lalaki. Okey ra man kang Bill, wala ma’y problema kaniya.” Kung okey ra kana kanako, nan aduna gyu’y sayup kanako; dili ko diay tinuod nga gihigugma ang maong babaye. Ug kung okey ra sab kaniya, nan aduna gyu’y sayup kaniya. Siya’y akong asawa; og dili ko gayud gusto nga dunay ubang lalaki nga magpakigrelasyon kaniya. Asawa *ko* man siya.

<sup>73</sup> Karon, ang husto gyud niini, mao’y, pareho sila nga adunay kamatuoran, apan dili ang eksaktong Kamatuoran.

<sup>74</sup> Bueno pagmoadto ako sa ubang nasud, aron mamahimong husto kini, pagatigumon ko ang akong gamay’ng pamilya, ug iampo namo ang usa’g usa. Ug itugyan ko sila sa Dios, ug itugyan pud nila ako sa Dios. Ug pag moadto kami, moadto na kami sa ubang nasud. . . pagmoadto na ako sa ubang nasud.

Karon, nasayod ko nga gihigugma ko niya; aduna ko'y pagsalig kaniya. Si- . . . ug gihigugma ko siya; aduna pud siya'y pagsalig kanako. Basta gihigugma ko siya nga sama niana, wala gayud siya'y angay'ng kabalak-an nga makigkuyog ako sa ubang babaye. Basta gihigugma ko niya nga tinuod, aba, dili ko usab kinahanglang maghunahuna nga dunay ubang lalaki nga makigkuyog-kuyog kaniya, tungod kay asawa ko man siya ug nagasalig ko kaniya.

<sup>75</sup> Siguro, kung makabuhat man ako og usa ka butang nga sayup, masayup ug makigkuyog sa kinsa mang babaye, ug pag-makabalik na ug isugid kini kaniya, ug sultihan siya, “Meda, wala ko gituyo nga buhaton kana. Nadala lang ako; miduol man gud kanako ang maong babaye ug—ug gibira ako diha sa bukton, ug misugod og *ingon-ini-ug-ingon-ana*,” nagatoo ko nga makasabot ra siya. Nagatoo ko nga pasayloon niya ako niini. Apan dili ko buhaton ang ingon-ana, bisan unsa pa man, tungod kay gihigugma ko siya. Bisan pa kon pasayloon ko niya, dili ko gihapon buhaton kana. Dili ko gayud siya pasakitan, bisan unsa pa man. Bisan pa kon nasayod ako nga pasayloon niya ako niini, dili ko gayud gusto nga pasakitan siya.

<sup>76</sup> Ug ingon niana usab sa Dios. Kung ako. . . kung ang gugmang *phileo*, nga tawhanong gugma, gugma sa panag-uban, mahimong magpabati og ingon-ana sa usa ka lalaki para sa iyang asawa; unsa pa kaha ang gugmang *agapao*, ang Griyegong pulong nga nagakahulogan “ang gugma sa Dios,” unsa pa kaha ang mahimo niana kanako para kang Jesus Cristo? Ako, basta gusto ko nga buhaton kini, anaa gyud sa akong kasingkasing nga buhaton kini! Bisan pa . . . moingon ko, basta anaa na sa akong kasingkasing nga buhaton kini, buhaton ko gayud kini. Ang legalismo dili motugot kanako nga buhaton kini, tungod kay nasayod man ko nga pagasilotan ako tungod sa pagbuhat niini. Apan ang tinuod nga Kamatuoran niini mao nga, pag nakasulod na sa imong kasingkasing ang gugma sa Dios nan *gusto* mo gayud nga buhaton Kini. Mao kana ang Kamatuoran niini. Mao kana ang duha ka opinyon. Dili nga legalismo o ang usa pa, o Calvinismo lang, ang duha niini mismo.

<sup>77</sup> Karon makita nato niining panahona, usab, nga pagkadaghan nang nagkalainlaing mga denominasyon. Anaay iglesiang Katoliko, ang iglesiang Protestante. Ang matag usa kanila nagaingon nga sila kono ang Dalan, kita n'yo, “Anaa kanamo ang Dalan, kami ang Kamatuoran.” Anaa sab ang Methodist, nga nagaingon, “Anaa kanamo ang Kamatuoran.” Nagaingon pud ang Baptist, “Anaa man kanamo ang Kamatuoran.”

<sup>78</sup> Bueno, para kanako, basta ingon niana ang ilang ginahunahuna, dili gyud kana mao, tungod kay miingon man si Jesus, “Ako mao ang Kamatuoran.” Kita n'yo?

<sup>79</sup> Busa, sama sa akong gikawali kagabii, nga Siya mao ang dapit diin gipahimutang sa Dios ang Iyang Ngalan, ang bugtong dapit alang sa pagsimba. Dili ka Cristohanon tungod kay usa ka ka Protestante. Dili ka Cristohanon tungod kay usa ka ka Katoliko. Dili pud ka Cristohanon tungod kay Methodist ka, Baptist, o Pentecostal man. Cristohanon ka tungod kay gibautismohan ka pasulod ngadto kang Jesus Cristo, pinaagi sa Balaang Espiritu, og dili pinaagi sa tubig. “Adunay usa ra ka Pagtoo; usa ra ka Ginoo; usa ra ka bautismo,” mao kana ang bautismo sa Balaang Espiritu. Ang bautismo sa tubig ang nagadala kaninyo ngadto sa pagpakig-fellowship. Ang bautismo sa Balaang Espiritu usab ang nagadala kaninyo nganha kang Cristo. Mao kana ang Kamatuoran.

<sup>80</sup> Aduna usab kita’y duha ka panghunahuna mahitungod niining *Kaminyoon Ug Panagbulag*. Karon, ingon nga, giablihan na sa atong Ginoo ang misteryo sa Pito-ka-Selyo sa Iyang Pulong nganhi kanato, sa niining kaulahiing mga adlaw. Karon, daghan kaninyo, tingali’g Griyego kini para kaninyo, apan masabtan kini sa akong iglesia. Pinaagi sa unsa? Ug nadungog na ninyo ang mahitungod sa mga panan-awon ug kung unsay nahitabo. Ug ang maong pangutana usa ka pangutana sa Biblia, og gidapit kita dinhi nga motoo nga siguradong aduna gyu’y usa ka tinuod nga tubag para sa kinatibuk-ang gililong nga tinago nga dugay nang gililong sukad pa sa pagkatukod sa kalibutan. Ug nagapropesiya ang Biblia ug nagaingon nga sa niining panahon maipahayag kini nga mga tinago. Pinadayag 10, “Ug sa pagtingog sa ikapitong manulonda, sa mensahero sa Laodicea, ang mga misteryo sa Dios maipadayag na.” Ug mao na kini ang ulahing kapanahonan, nga mao ang Laodicea.

<sup>81</sup> Matikdi n’yo ang kinatibuk-an niiniing rebaybal nga nagpadayon sulod sa kinse ka tuig o sobra pa, ug wala gyu’y ni usa ka denominasyon nga mitungha gikan niini. Nagkaaduna og rebaybal si Luther, adunay mitungha nga usa ka denominasyon; sa kang Wesley, adunay mitungha nga usa ka denominasyon; sa kang Alexander Campbell, aduna usab og mitungha nga usa ka denominasyon; ang tanan niining uban pang bautugang . . . si John Smith ug uban pa, mga denominasyon, si Moody, og tanan na. Apan dinhi adunay usa . . . Kasagaran mga tulo ka tuig lang nagalungtad ang rebaybal. Apan sobra kinse ka tuig na kini nga nagapadayon, ug wala gyu’y ni usa ka denominasyon nga mitungha gikan niini, tungod mao na man kini ang panahon sa Binhi. Wala na’y tipaka; human nga mawala na ang tipaka, ang Binhi na kini dayon.

<sup>82</sup> Andam na ang Dios, kung wala pa Niya kini ginabuhat karon, magatawag Siya og usa ka Iglesia paingon sa kahingpitan pinaagi sa Iyang Pulong, si Jesus Cristo. Matikdi, siguradong aduna gayu’y tubag sa kon asa man, ug ingon nga ang misteryo sa Dios selyado og Pito ka Selyo, Pito ka Selyo . . .



<sup>83</sup> Pila man ang nakasabot niana, ipataas ang inyong kamot. Atong tan-awon. Sa hunahuna ko kadaghanan kanila sa atong kongregasyon ra man gikan, paminaw mo. Kung dili, hapit na man maipagawas ang mga libro, mahitungod sa maong hilisgotanan. Aduna pud kita'y mga basahon, pipila ka basahon mahitungod Niini karon.

<sup>84</sup> Si Jesus, diha sa atong teksto, nagadapit kanato nga mobalik ngadto sa sinugdanan, para sa tinuod nga tubag nga uyon sa Kasulatan.

<sup>85</sup> Karon, sa dihang giatubang Niya kini kaniadto, adunay duha ka butang nga giklaro. Miingon ang mga sacerdote ngadto Kaniya, “Mahimo bang biyaan sa usa ka lalaki ang iyang asawa, magminyoy og lain, sa bisan unsang hinungdan?”

Ug miingon si Jesus, “Sukad sa sinugdan dili mao kini.”

Dayon miingon sila, “Nagtugot man lagi kanamo si Moises og usa ka sulat-pamatuod sa panagbulag, ug sa pagbiya sa asawa sa bisan unsang hinungdan nga gusto nila.”

<sup>86</sup> Miingon Siya, “Kadto, gibuhat kadto ni Moises tungod sa,” mohunong 'usa ko dinha sa makadiyut, “tungod sa kagahi sa inyong mga kasingkasing; apan sukad pa, o sa sinugdan dili mao kini.” Ang pangutana!

<sup>87</sup> Ang pangutana karong panahona, sama mahitungod sa pakigdait sa kalibutan, “Mahitabo ba kini pinaagi sa pulitika, sa pagtipon-tipon sa mga nasud, nga nagkahiusa?” Sultihan ko kamo, dili. Pakyas na kini sa una pa, ug mapakyas gyud pag-usab. Apan aduna sa gihapon og tinuod nga tubag sa maong pangutana, “Magkaaduna pa ba og pakigdait sa kalibutan?” Oo, pag ang sala mawagtang na sa kalibutan, magkaaduna na og pakigdait. Apan hangtud niana nga panahon, wala gayu'y pakigdait; “managgubat ang nasud batok sa nasud, ug ang gingharian batok sa gingharian.” Ngani naghatag man ang Dios og pang-sulbad para sa sala. Paminaw mo og ayo karon. Naghatag ang Dios og pang-sulbad aron nga mawagtang ang sala sa kalibutan, apan dili man dawaton sa tawo sa yuta ang pang-sulbad sa Dios.

<sup>88</sup> Gihatagan kita sa Dios og pang-sulbad ug paagi aron minyoan ang atong mga asawa ug magkinabuhi kauban sila, apan dili man dawaton sa tawo ang pang-sulbad sa Dios, dili dawaton ang Iyang Pulong mahitungod niini. Gisulti na ni Jesus kini. Ug nagpahinumdom kini kanato sa—sa Iyang mga Pulong, nga nanghibalo kita nga miingon Siya, “Ang mga langit ug yuta mapakyas, mangahanaw, apan ang Akong Pulong dili gayud mapakyas.”

<sup>89</sup> Ang pangutana, ang tinuod nga tubag nga gusto ni Jesus nga atong balikan, mao ang pagbalik sa sinugdanan. Kung ingon-ana, sa Genesis kana, kay ang pulong nga *Genesis* mao man ang binhing kapitulo sa matag pangutana diha sa Biblia.

Ug kinahanglan mong mobalik kanunay ngadto sa binhi aron mahibaloan kung unsa nga matang sa binhi ang anaa sa umahan, aron mahibaloan mo kung unsay imong mga pagaanihon. Bueno, unsa diay nga matang sa binhi ang naipugas kaniadto? Ang Genesis, ingon nga mao ang binhing kapitulo, balikan nato ang Genesis. Gipresentar ni Jesus kanato kana nga Kasulatan, “sa sinugdanan.” Karon, hinumdumi, nga dinha nagsugod ang panahon. Sa wala pa kana, Eternidad pa lang. Karon, ang atong pangutana dinha, matikdi, kung balikan nato ang sinugdanan.

<sup>90</sup> Karon ayaw n’yo kini pakyasa! Ug mao kana’y hinungdan nga gusto kong manulti nga hinay, para sa mga tawo nga nakakonekta dinha sa mga telepono, ug aron klaro kini nga maisulti diha sa teyp.

<sup>91</sup> Kung miingon si Jesus, “Balik ngadto sa sinugdanan,” adunay usa lamang ka pares sa bisan unsang butang sa yuta kaniadto. Adunay usa ka Adan, usa ka Eva, og gihiusa sila sa Dios mismo. Usa ka babayeng kabayo, usa pud ka laki nga kabayo; usa ka babayeng parrot, usa pud ka parrot nga laki. “Sa sinugdan,” sumala sa gikasulti Niya kanato nga mobalik, adunay usa lamang ka pares kaniadto sa bisan unsang butang. Tinuod ba kana? Dayon, hingsayran nato nga ang tanan-tanan “sa sinugdan” atua mismo sa hingpit nga kahan-ayan ug panagkauyon sa Dios, wala gayu’y bisan unsa nga wala sa kahan-ayan.

<sup>92</sup> Ang tanan-tanan sa langit anaa gihapon sa kahan-ayan; ang tanang mga bitoon, ang mga kawanangan, ang solar system, ang tanan-tanan anaa gayud sa hingpit nga kahan-ayan. Pag usa lang niadto ang moirog, nan maguba gayud ang kinatibuk-ang programa.

<sup>93</sup> Karon paminaw. Nasabtan ba ninyo? Sa usa lang ka pagbalda maguba na ang kinatibuk-ang programa! Karon, kaniadtong nagkinabuhi pa ang mga tawo nga uyon sa Dios, nga usa pa ang lalaki ug usa pa ang babaye, sa nakasala kining babaye ug gipatipas niini ang tibuok programa sa kalibutan gikan sa pagkatakdo sa Dios. Busa, usa ra ka pulong nga igadugang ngadto niini nga Basahon, o kaha usa ra ka Pulong nga pagataktakon gikan Niini, magpahisalaag gayud sa usa ka Cristohanon gikan sa pagkatakdo sa Dios, magpahisalaag sa usa ka iglesia gikan sa pagkatakdo sa Dios, magpahisalaag sa usa ka pamilya gikan sa pagkatakdo sa Dios. Ang matag magtotoo mahimo gayud nga mapahisalaag, tungod sa dili pagdawat sa matag Pulong sa Dios.

<sup>94</sup> Dayon, ang babaye mao ang naghinungdan sa pagkabungkag sa matahum nga panimalay kaniadto. Dili usa ka Kerubin ang nagdaut sa kalibutan. Dili si Adan ang nagpabungkag sa panimalay. Dili ang unsa pa mang butang ang nagpabungkag sa panimalay, ug nagpahigawas sa tibuok

butang gikan sa kahan-ayan, kondili ang usa ka babaye, si Eva. Ug dinhi nga “ang sinugdan,” ang gisulti ni Jesus, nga naguba. Miingon si Jesus, “Sa sinugdan, naghimo ang Dios og usa ka lalaki, usa ka babaye, sa matag matang.” Ug karon sa diha nga kining babaye. . . dili nga babayeng kabayo, dili nga babayeng iro; kondili ang tawong babaye, giguba niya ang kinatibuk-ang kahan-ayan sa pagpamuhat sa Dios sa ibabaw sa yuta, ug gibalhog ang tanan-tanan ngadto sa kamatayon. Ang babaye, dili ang lalaki, ang babaye mao’y naglapas sa pakigsaad. Gilapas niya ang pakigsaad, tungod kay (ngano man?) milagpas man siya sa mga utlanan sa Pulong sa Dios. Karon, kung gilapas niya ang iyang pakigsaad sa iyang bana, gilapas pud niya ang iyang pakigsaad sa Dios; kung ingon-ana, tungod kay gilapas man niya ang pakigsaad sa Dios, nan gilapas pud niya kini sa iyang bana.

<sup>95</sup> Ug pag napakyas mo ang imong saad ug ang imong pakigsaad sa Pulong sa Dios, mao kana’y hinungdan nga daghan kaayong ilehitimo nga mga miyembro sa iglesia, tungod nga nagkatigum-tigum man ang usa ka pundok sa kalalaken-an ug miingon, “Bueno, dili man *ingon-ana* ang buut ipasabot Niini,” ug napahigawas niini ang tibuok organisasyon gikan sa pagkatakdo sa Pulong. “Wala kami nagatoo Niana. Miingon man gud si Doktor Jones nga dili kono ingon niana Kana.” Apan basta giingon sa Dios nga ingon niana Kini, ingon Niya, “Ang matag pulong sa tawo bakak, ug ang sa Ako mao’y Kamatuoran!” Dinha nagakaputol ang pagkatakdo.

<sup>96</sup> Karon atong nakita, tungod nga naputol ang pagkatakdo, nan naputol ang linya sa Kinabuhi, naputol usab ang linya sa panahon, pagka-lapas sa pakigsaad, ang tanan-tanan nangaguba! Unsa ma’y nagpahinungdan niini? Usa ka tawong babaye. Siya ang naglapas sa pakigsaad. Karon, kung gusto n’yong basahon kana, mabasa n’yo kana, sa Genesis 3.

<sup>97</sup> Bueno, mao na kadto dayon nga gihimo ang lalaki nga mangulo sa babaye, pinaagi sa Pulong sa Dios. Dili na siya kapareho sa lalaki. Kapareho siya unta sa kinaiyahan kaniadto, kabalo na mo; apan, sa dihang iyang gilapas ang Pulong sa Dios, gihimo sa Dios nga ang lalaki mao’y mangulo na kaniya. Genesis 3:16, kung gusto n’yong isulat kini. Dili na siya kapareho sa lalaki. Siya man mao ang naglapas sa Pulong sa Dios.

<sup>98</sup> Dili ba ninyo makita, “siya,” ang babaye, ang iglesia sa karon? Ang mao’y naglapas sa Pulong sa Dios, nga bug-os nagpahigawas kaniya gikan sa pagkatakdo. Ug ingon niana ang gibuhay sa iglesia, nga naghinungdan og espirituhanong kamatayon sa maong tibuok butang. Karon nasabtan n’yo na kon nganong ginasaway ko kining mga butanga sama sa ginabuhay ko. Kamatuoran kini! Mga kamatuoran kini sa Biblia.

<sup>99</sup> Matikdi, nganong gibuhath man sa babaye ang ingon niadtong butang? Giunsa man paghimo niadtong hiligugmaon, matahum, og hingpit nga babaye. . . ?

<sup>100</sup> Nakakita ko og usa ka retrato usa ka higayon niadtong, nagtoo ko nga sa Greece kadto, gikan sa usa ka pintor nga nagdrowing og usa ka hulagway ni Eva. Nahimo hinoon si Eva nga may pinakangil-ad og hitsura nga makita n'yo sukad-sukad. Nagapakita lang kana kung unsa ang mahimong mahunahuna sa usa ka karnal nga panghunahuna. Apan, dili baya siya ingon niadtong; matahum siya, tungod kay usa man siya ka hingpit nga babaye, putli nga babaye.

<sup>101</sup> Matikdi, nganong gibuhath man niya ang ingon niadtong butang, ingon nga anaa man unta siya sa hataas nga matang? Kauban niya mismo ang lalaki, ingon nga kapareho niya. Apan hingsayran natong tanan karon nga nawala niya ang iyang pagkahisama sa lalaki, sa nakasala na siya, ug miingon ang Dios, "Ang lalaki na ang mangulo kanimo sukad karon." Bueno, mao kana ang Kasulatan. Kung gusto ninyo, puede man natong basahon kini.

<sup>102</sup> Ginahatag ko kaninyo ang mga Kasulatan, aron makadaginot ta og oras para niining mga nakakonekta sa tibuok nasud, og aron nga mabasa n'yo mismo kini.

<sup>103</sup> Matikdi n'yo ang hinungdan nganong gibuhath niya kadto. Sa unsa bang paagi nga nakaduol si Satanas kaniya kaniadtong?

<sup>104</sup> Nahibalo ba mo nga si Satanas kahisama sa Dios usa niadtong ka adlaw? Oo, kahisama sa tanan-tanan gawas lang sa pagkamagbubuhath; siya'y tanan na, nagatindog siya kaniadtong sa tuo mismo sa Dios, didto sa Kalangitan, ingon nga mao'y pinakahalangdon nga Kerubin.

<sup>105</sup> Matikdi ang hinungdan nga gibuhath kadto ni Eva, wala man siya kaniadtong sa orihinal nga paglalang. Wala siya sa orihinal nga paglalang sa Dios; siya'y binuhath lang gikan sa orihinal. Busa, "sa sinugdan," sumala sa gisulti ni Jesus dinhi, dili siya orihinal nga linalang sa Dios. Siya'y binuhath lang gikan sa lalaki, kaniadtong gihisgotan ni Jesus "ang sinugdan."

<sup>106</sup> Hinumdumi, nga si Adan kaniadtong parehong lalaki ug babaye, sa orihinal nga paglalang, usa ra, apan pagkahuman gibulag siya pinaagi sa usa ka gusok.

<sup>107</sup> Matikdi, ingon nga usa ka binuhath lang gikan sa orihinal, ug, matikdi, ang tawong babaye lamang ang usa sa tanang binuhath sa Dios, sa tanang hayop ug unsa pa man, siya lamang usa ang gidisenyo nga ingon niana. Ang tanang uban pa nga babaye anaa man sa orihinal nga paglalang. Ang tanang uban pa nga babaye anaa sa orihinal nga paglalang, apan wala si Eva sa orihinal nga paglalang. Kita n'yo, kinahanglan man gud kadto buhaton nga ingon niadtong. Hisgotan ra nato kana pagkataudtaud. Matikdi, sa ingon niini nga paglalang kaniya, nga wala sa orihinal,

kondili usa ka binuhat lang gikan orihinal. Ug sa ingon-ini nga paglalang, adunay . . .

<sup>108</sup> Karon dili ko gusto nga makapasakit sa inyong pagbati, apan gusto ko lang isulti kaninyo ang Kamatuoran. Ug pabilin lang mo sa paglingkod; maayo man ang ginabuhat ninyo.

<sup>109</sup> Wala na’y uban pa nga gidisenyo nga ingon ka malimbongan, sama sa usa ka babaye nga malimbongan. Wala na gayu’y uban pa; wala na’y uban pa nga gihimo nga ingon niana.

<sup>110</sup> Usab, wala na gayu’y uban pa nga dali ra kaayong malimbongan nga sama sa usa ka babaye. Karon, ginapamatud-an sa pagkahulog kaniadto nga tinuod kini nga pamahayag, ang pagkahulog sa sala niadtong sinugdanan.

<sup>111</sup> Wala siya sa orihinal nga paglalang sa sinugdan kaniadto. Anaa ra siya kang Adan, apan dili ingon nga usa ka babaye, mismo, sa sinugdan. Siya’y gibuhat lang gikan sa orihinal.

<sup>112</sup> Bueno, wala na’y uban pa nga gidisenyo nga makapanglimbong, ug malimbongan, nga ingon ka sayon sama sa usa ka tawong babaye. Wala na’y uban pa nga gidisenyo o moubos sa ingon ka ubos sa moralidad kaysa mahimo sa usa ka babaye. Hunahunaa n’yo karon. Wala gyu’y unsa man nga gidisenyo, sa tibuok kabuhatan, nga moubos sa ingon ka ubos sa moralidad nga mahimo sa usa ka babaye. Mahimo niyang wataswaton ang kasingkasing sa lalaki sa ingon ka sayon nga wala na’y uban pa sa kalibutan ang makahimo niini, ang asawa ra. Pag kanang matahum nga asawa makigkuyog-kuyog sa ubang lalaki; tan-awa n’yo kanang bana nga maglingkod na lang didto uban ang iyang mga anak, nga nagatulo ang mga luha sa iyang mata. Gidisenyo man gud siya nga ingon niana. Gidisenyo siya nga buhaton ang ingon niana. Walay baboy, walay iro, o walay uban pa nga hayop, ang gidisenyo nga sama sa tawong babaye o moubos sa ingon ka ubos sa moralidad nga mahimo niya. Bueno, tinuod kana.

Mahitungod usab sa mga igsoon kong babaye, gusto ko lang nga matikdan ninyo.

<sup>113</sup> Walay hayop ang mamahimong imoral. Ngani ginatawag n’yo ang iro nga usa ka “maulagon,” ang babayeng iro, ginatawag n’yo usab ang lalaking . . . ang baboy nga usa ka “anay,” apan ang moralidad baya niini usa ka milyon ka milya ang kahalayo kay sa daghang artista sa Hollywood. Ingon niana ka ubos ang pagkadisenyo sa tawong babaye aron magpakaulaw. Dili niya mahimong . . . Hunahunaa lang kini karon. Wala na’y unsa man sa kalibutan, nga gihimo diha sa kabuhatan sa Dios, nga mamahimong imoral, og moubos nga ingon niana ka ubos.

<sup>114</sup> Moingon mo, “Kadali lang, ‘ang lalaki diay!’” Modangat ra kita unya dinha. Siguradong moingon gyud ang babaye og “oo.”

<sup>115</sup> Matikdi, walay unsa man nga gidisenyo nga moubos sa ingon ka ubos, o mamahimong ingon ka imoral, gawas sa tawong babaye. Dili kana mahimo sa usa ka iro, dili kana mahimo sa usa ka baboy, dili pud kana mahimo sa usa ka langgam. Walay hayop nga imoral, ni mamahimo kini nga imoral, tungod kay wala man kini gidisenyo nga mamaingon niana. Dili man mamahimong imoral ang usa ka babayeng baboy, dili mamahimong imoral ang usa ka babayeng iro, dili mamahimong imoral ang usa ka babayeng langgam. Ang tawong babaye lang ang makahimo niana.

<sup>116</sup> Karon nakita na ba ninyo kon diin mipaingon si Satanas? Kita n'yo? Apan ang babaye sa gihapon, siya man mao ang may kagahum nga moingon og "oo" o "dili." Kita n'yo, depende na lang kung asa niya ipuwesto ang iyang kaugalingon. Kita n'yo? Karon dinhi makita nato sa ingon ka tataw ang binhi sa serpente, kon asa kini nakasulod. Aduna lang ma'y usa ka dapit nga mahimo niyang sudlan. Kung dili pa gani niini maiklaro kana, nan aduna gyu'y buta. Kita n'yo? Kita n'yo, siguradong dinha gyud kini misulod.

<sup>117</sup> Matikdi, ang hinungdan nga dili kadto mabuhat sa mga hayop, sa usa ka babayeng hayop, tungod anaa man sila sa orihinal nga paglalang. Apan wala ang tawong babaye sa orihinal nga paglalang. Karon mobalik kita aron diskubrehon ang mahitungod niini, dayon dalhon kamo diretso mismo sa modernong panahon, diha sa maong Tugon.

<sup>118</sup> Gidisenyo siya, siya lang, alang sa kalaw-ayan ug mahugaw nga pagkinabuhi. Ang iro dili man makahimo niana, ug wala na'y ubang babaye ang makahimo niana. Ang tawong babaye lang ang makahimo. Ang iro o unsa mang uban pa nga mga hayop, kausa lang sa usa ka tuig, ug kana'y para makabaton kini og mga anak; dili nga para sa pagpakighilawas nga kalipay, kondili aron nga makabaton og mga anak. Ang anay nga baboy, ang babayeng iro, kausa lang sa usa ka tuig, sa usa ka higayon, kana'y para makabaton kini og mga anak. Apan gidisenyo ang tawong babaye para sa bisan unsang orasa nga gustohon niya. Adunay pipila ka mga gilaktawan ko na lang dinhi karon; mahunahuna na man ninyo ang uban pa. Dili makahimo ang iro; ang tawong babaye ra ang makahimo. Nagalaum ko nga igapadayag ra kaninyo sa Balaang Espiritu ang uban pa nga bahin niining akong mga gipanas dinhi.

<sup>119</sup> Siya lang ang bugtong matang, matang sa babaye, nga gihimong mas maanyag kay sa lalaki. Wala na'y uban pang matang sa bisan unsang butang. Ang tanang uban pa nga mga linalang sa Dios mao'y matahum nga mga laki, sama sa mga hayop, mga langgam, ug uban pa, sa kanunay ang laki gyud ang matahum.

120 Tan-awa n'yo ang dakung laking lagsaw, nga may dagkung maanindot nga mga sungay, pagkaanindot nga matang; ug ang gamay'ng, mapainubsanon nga babayeng usa. Tan-awa sab ninyo ang dakung sunoy uban sa tanan niining maanindot nga mga balahibo; ug ang gamay'ng, tabonon nga himongaan. Tan-awa ninyo ang maong mga langgam, ang sunoy ug ang himongaan. Ngano kaha? Nganong ingon niana man, sa tanang mga linalang sa Dios? Sa tanang hayop, ang laki mao ang pinakamatahum. Sa mga karnero, sa mga—mga baboy, sa mga kabayo, sa unsa pa mang hayop, kanunay gyud nga ang laki ang mao'y matahum, ug sa mga langgam usab.

121 Apan diha sa tawo, ang babaye mao ang maanyag, dili ang lalaki; kay kung ang lalaki man, nan aduna gayu'y sayup, basin adunay gisagol nga binhi sa kon asa man. Sa orihinal ingon na gyud niana. Ngano kaha? Nganong ingon niana man? Aron nga makapanglimbong. Ang tigpaanyag sa babaye, nga si Satanas, mao ang nagapaanyag gihapon kaniya, sa niining kaulahiing mga adlaw.

122 Mohunong 'usa ko dinhi sa makadiyut. "Maanyag!" Nahibalo ba mo, nga sa unang paglalag kaniadto, sa mga nasud kaniadto, sa kalibutan, o sa tibuok kalibutan, mao'y tungod sa maanyag nga mga kababayan-an? "Sa dihang nakita sa mga anak nga lalaki sa Dios ang mga anak nga babaye sa mga tawo nga maanyag, nagkuha sila alang kanila og mga babaye." Husto ba kana?

123 Namatikdan ba ninyo ang samot pa nga pagkaanyag sa mga kababayan-an niining panahona? Nakakita na ko sa retrato ni Pearl O'Brien, nga mao kono ang pinakamaanyag nga babaye sa nasud, kaniadto. Wala gani ni usa ka batan-ong babaye sa niini nga tulonghaan ang mahimo niyang malabwan, paghisgotan ang kaanyag.

124 Ginapakita lang sa samot pa nga pagkaanyag sa mga kababayan-an ang panahon sa pagpanglimbong. Kanus-a ba ang iglesia nga nahimong mas maanyag kaysa sa karon? Ang tanantanang nagapasundayag og dagku, kaayong maanindot nga mga bilding, ug minilyon nga *ingon-ini* ug minilyon nga *ingon-ana*. Dili ba ninyo makita, "ang babaye," ang pagpanglimbong!

125 Bueno, walay unsa man nga mahimong moubos sa pagkamoral sama kaniya, ug gidisenyo gayud siya aron nga makapanglimbong siya. Ug nagapamuhat gayud si Satanas diha kaniya karong panahona, sa niining kaulahiing mga adlaw, tungod kay si Satanas man ang iyang tigpaanyag. Mapamatud-an ko kana karon. Sa pagbalik mismo sa sinugdanan, kinsa ba'y sugod nga namuhat kaniya, si Adan ba o si Satanas, ang Dios ba o si Satanas? Kita n'yo, mao kana ang iyang tigpaanyag. Siya ang pinaka-hinagiban ni Satanas aron danihon ang lalaki ngadto sa iyang kahugawan, ingon nga usa ka maanyag nga

babaye, mahimo niyang ipahisalaag ang lalaki sa unsa mang paagi nga gusto niya. Igsoon, dili man ang balay-imnanan dinha ang nagadani sa lalaki; ang maanyag nga babaye kini nga nagalakaw dinha sa dalan, nga ginapakiay-kiay ang iyang kaugalingon, nga halos hubo na. Mao kana ang nagapadani. . . Mao kana ang manglilimbong mismo dinha. Ug ingon nga gamit kana siya'y pagka-delikado, gayud. Mahimong duhaduhaan mo ako mahitungod kang Satanas ingon nga iyang tigpaanyag, apan mao kana ang Kamatuoran. Gipaanyag siya ni Satanas. Ginabuhat niya sa gihapon kana.

126 Aduna ko'y ipakita kaninyo diha sa Kasulatan. Kinahanglan ko kamong dalhon ug balik sa Kasulatan, ug paghimo mo og inyong opinyon samtang ginasusi n'yo kini karon.

127 Si Satanas mao ang nagrepresentar sa ingon nianang matang sa kaanyag. Kung matikdan nato, siya baya ang pinaka maanyag sa tanang mga Anghel sa Langit kaniadto. Husto ba kana? Ug gitinguha niya nga himoon ang Langit nga mas matahum pa nga dapit kaysa sa gingharian ni Michael. Husto ba kana? Usab, aron maipakita nga si Cain mao ang iyang anak, nagtanyag siya og mas matahum nga pagsimba, gidayan-dayanan ang iyang mga altar og mga prutas ug mga bulak, ug uban pa. Husto ba kana? Maanyag! Maanyag ang sala, ang ginatawag natong kaanyag karong panahona. Ug malimbongan ang sala, tungod sa kaanyag. Dili mo mahimo nga pagkakita mo sa usa ka babaye nga nagalakaw dinha sa dalan ug masulti mo na kung unsay anaa sulod sa iyang kasingkasing. Kita n'yo? Apan gusto ko nga isulti kining mga butanga aron nga inyong masabtan kon nganong si Satanas man ang tigpaanyag sa babaye. Eksakto gayud kana, gipamatud-an kini sa iya mismong anak, nga si Cain. Karon, maanyag ang babaye aron siya'y makapanglimbong.

128 Matahum usab ang kalibutan aron makapanglimbong kini. Ang buut kong ipasabot *kosmos*, ang sistema sa kalibutan. Matahum kini aron nga makapanglimbong kini, dagkung maanindot nga mga lugar ug kaharuhay.

129 Hinumdumi n'yo ang propeta, nga si Amos, kaniadtong miadto siya ug milantaw ngadto sa maong siyudad, ug nakita kadto nga susama na sa usa ka modernong Hollywood, og naningkit ang iyang gagmay'ng mga mata, ilalum sa ubanon na nga balbas nga nakadunghay sa iyang nawong. Ug miadto siya didto nga dunay usa ka Mensahe, ug gipalanog Kini sa maong dapit. Miingon siya, "Ang mismong Dios nga ginapamahayag ninyo nga inyong ginaalagaran, mao'y magalaglag kaninyo!" Husto kana.

130 Maanyag, ang sala. Ginahulagway nila si Judas ingon nga usa ka tigulang nga palahubog nga nagbuy-od dinhi sa kalsada sa kon asa man, ug nangganga ang baba nga ginalangaw, ug uban pa, ingon niana kono si Judas. Si Judas guwapo, kusgan, og



usa ka manglilimbong. Dili kanang lalaki nga kinahanglan mong bantayan, dili kanang lalaki nga (dugay nang mag-uuma) nga moanhi nga nagasul-ob og usa ka pares nga overall, ang angay mong bantayan dinha nga nagalibot-libot sa imong asawa; kanang guwapong mangbisti nga tawo, siya kanang salbahis.

<sup>131</sup> Maanyag ang sala para sa panglantaw sa kalibutan, apan wala man girepresentar ang Dios sa ingon nianang matang sa kaanyag. Nasayod ba mo niana? Girepresentar ang Dios diha sa maayong kinaiya, matahum nga kinaiya.

<sup>132</sup> Diha sa Biblia, sa Isaias 53, kung gusto n'yong isulat ang maong Kasulatan. Aduna kini'y mga laray sa Kasulatan nga nahisulat dinhi sa daplin para niini. Isaias 53, miingon ang Biblia mahitungod sa atong Ginoong Jesus, nga, "Walay katahum aron atong tinguhaon Siya. Ug gitago sa mga tawo ang ilang nawong gikan Kaniya." Husto ba kana? Wala nato gitinguha Siya, tungod kay dili man Siya maanyag. Tingali'g usa Siya ka gamay'ng lalaki, bakoon ang abaga, ordinaryo kaayo ang hitsura, ug dili gyud Siya takus nga mamahimong lider. Dili usa ka lider ang Iyang hitsura. Nagasulti sa ordinaryong sinultihan sa kalsada, ug uban pa, sama sa ginabuhat sa mga tawo, sama sa ordinaryong mga tawo, busa dili Siya kapareho sa kinsa mang bantugang eskolar, edukado, maayo, nakabisti og ayo, ug tanan na. Siya'y usa lamang ka ordinaryong Tawo. "Walay katahum Kaniya, aron atong tinguhaon Siya." Nagaadto-nganhi ra Siya sa taliwala sa mga tawo, mismo, wala gani sila makaila kung Kinsa Siya. Siya'y dili usa ka dios kon tan-awon nga nagalakaw, sumala sa kung unsay atong hunahuna mahitungod sa usa ka dios. Apan, bisan pa man, Dios gyud Siya!

<sup>133</sup> Namatikdan ba ninyo sa dihang miingon ang Ginoong Dios ngadto kang—kang Samuel, "Umadto ka sa balay ni Jesse ug dihogi ang usa sa iyang mga anak, ingon nga hari, aron mopuli kang Saul"?

<sup>134</sup> Bueno, gipili sa mga tawo si Saul, sa dihang bug-os nang gisulti ni Samuel kanila nga dili nila kadto buhaton. Ang ingon niya, "Dili gusto sa Dios nga magkaaduna kamo og hari; Siya man ang inyong Hari." Ug ingon pa, "Aduna ba ko'y gisulti kaninyo sukad og bisan unsang butang, diha sa Ngalan sa Ginoo, nga wala mahitabo? Nanglimos ba ako kaninyo og salapi o *ingon niana*, para sa akong panginabuhi?"

<sup>135</sup> Miingon sila, "Wala man, wala ka sukad nanglimos kanamo og salapi. Ug unsa ma'y gisulti mo, diha sa Ngalan sa Ginoo, nahitabo man gyud. Apan gusto namo og hari, bisan pa man," mao nga gipili nila si Saul. Tan-awa n'yo kung unsay gipili sa kalibutan! Tan-awa n'yo kung unsay gipili sa Israel! Ang Israel, nga dinihogan sa Dios, gipili nila ang usa ka tawo nga mao ang pinakalabaw sa kinsa man nga tawo sa nasud; bantugan, daku,

ambongang, guwapong lalaki, ug siya kanunay'ng nagahatag og kadautan.

<sup>136</sup> Apan miingon ang Dios, “Mopili ako para kaninyo og usa ka hari sumala sa Akong pagpili.” Busa miingon Siya, “Samuel, dili Ko isulti kanimo kung kinsa siya, apan umadto ka didto. Siya’y usa sa mga anak ni Jesse.”

<sup>137</sup> Ug si Jesse, ang iyang asawa, ug nagtinan-away silang tanan, miingon, “Oo, ang among kamagulangang anak, siya’y daku, taas, guwapong lalaki, bagay ra gyud kaniya ang korona sa hari. Utokan siya. Edukado siya. Hinashasan siya nga tawo. Nasayod ko nga angayan gayud siya. Maayo man pud siyang manulti.”

<sup>138</sup> Sa dihang gidala na nila siya didto, gikuha ni Samuel ang tibod sa lana ug miduol kaniya. Ingon niya, “Dili, gibalibaran man siya sa Dios.” Busa miabot siya hangtud, sa unom ka anak nga lalaki, ug gibalibaran gihapon sa Dios ang matag usa kanila. Ingon niya, “Aduna pa ba’y usa?”

<sup>139</sup> “Oh,” miingon ang amahan, “oo, aduna pa, atua siya sa halayo nga nagabantay sa mga karnero. Nagalingkod ra man siya didto ug nagatugtog og mga alawiton, ug ginaawit kini, ug nagasinggit pa, ug ingon-ana lang. Apan, gamay man siya og bakoon ang abaga, mapula-pula nga bata, dili gyud siya mamahimong usa ka hari.”

<sup>140</sup> Ingon si Samuel, “Sige ipakuha siya.” Ug samtang nagaduol si David sa atubangan sa propeta, midagan ang propeta nga dala ang lana ug gibubo kadto sa ulo ni David, og miingon, “Mao kini ang gipili sa Dios.” Dili kaanyag; kondili maayong kinaiya. Kinaiya ang ginatan-aw sa Dios.

<sup>141</sup> Natural nga kaanyag ang ginatan-aw sa tawo. Malimbongon kini. Ug mao kana kon nganong gikahatagan ang babaye og ingon-ana nga kaanyag, alang sa pagpanglimbong, aron manglimbong. Ang usa ka maanyag nga babaye, kung dili niya kini gamiton sa husto nga paagi, nan usa kini ka tunglo para kaniya; nga magahatud kaniya ngadto sa impiyerno nga mas paspas kay sa unsa pa mang butang nga nasayran ko. Kung iya lamang. . . . Puede man siyang magmaanyag, sigurado, basta magpabilin lang siya sa iyang bana ug buhaton ang husto, ug kana—maayo gayud kana. Apan mahimo pud niyang gamiton kanang maong butang ug, aba, makapanglimbong gayud siya pinaagi niini, kay gikahatag man kini kaniya para buhaton ang ingon niana.

<sup>142</sup> Himatikdi, karon, apan girepresentar ang Dios diha sa maayong kinaiya. “Walay katahum nga atong tinguhaon kang Jesus,” apan wala gayu’y usa ka kinaiyahan nga sama sa Iya, dinhi sa kalibutan.

<sup>143</sup> Karon hingsayran nato, niining panahona, nga ang—ang kinaiya sa iglesia, ni Satanas ug sa iyang grupo, mao ang pagtan-aw sa dagkung, maanyag nga mga iglesia, og maanyag

nga mga butang. Ingon niana ang ginatan-aw sa iglesia karong panahona. “Oh, ingon niini ang pastor, sa bantugang *ingon-ani-ug-ingon-ana* nga panahon, pari gayud kaayo siya ug diosnon, pagnagalakaw, nga sul-ob kining mga hatag-as nga bisti, ug mga ingon-anang butang.” Ginatawag nila kana nga kaanyag.

144 Apan ang tinuod gyud nga mga balaan sa Dios nagatan-aw sa kinaiya sa gipanghimatud-an nga Pulong.

145 Ingon niana ang gibuhat sa mga balaan kaniadto nga panahon, sa dihang nakita nila si Jesus. Wala gyu’y unsa man nga angay’ng tan-awon Kaniya, apan nakita nila ang Dios nga anaa Kaniya. Nakita nila ang Dios nga anaa uban Kaniya.

146 Ingon niana usab, sila ni Joab ug kadtong mga tawo nga kauban ni David, nga usa ra ka gamay’ng lalaki, apan nakita gyud nila ang—ang pagka-lalaki diha kang David. Nakita nila nga anaa kaniya ang Dios, ug nasayod sila nga magahari siya sa umaabot nga adlaw. Sila . . . Adunay usa kanila nga gipatay ang uban pang lima ka igsoon ni Goliath, nga nag-inusara lang. May usa pud nga nakapatay og tulo ka gatus nga mga kalalaken-an; sa dihang ang pipila ka mga babaye kaniadto namupo og mga batong para sa paniudto, ug sa nakagikan na ang mga sundalo, ug mikuha siya og usa ka bangkaw ug gipatay ang tulo ka gatus nga mga kalalaken-an, nga mga Filistihanon. Tungod sa maayong kinaiya! Ngano man? Nagpabilin sila mismo kang David. Nasayod sila nga ang pagdihog anaa kaniya, ug nasayod sila nga magahari gayud siya.

147 Usa kini ka tinuod nga hulagway mismo sa Iglesia karong panahona nga magabarug sa Pulong! Nasayod kita nga pagapanghimatud-an Kini. Nasayod kita nga magahari gyud Kini sa umaabot nga adlaw. Bisan pa nga si Saul . . . Ug si David usa ka layas kaniadto didto sa nagkalainlaing mga nasud, apan nasayod sila nga magahari gyud siya. Nasayod kita nga magahari ang Dios, usab, mao nga ginatoohan nato ang Pulong ug nagapabilin dinha mismo, bisan unsa pa ang mahitabo. Kung kinahanglan man natong tigbason ang mga Filistihanon, o moambak sa gahong ug mopatay og usa ka leon, sama sa gibuhat niadtong usa, moadto gyud kita bisan pa man, tungod kay kini man ang . . . ingon niana man ang pagdisenyo niini sa Dios. Kinaiya ang atong ginatan-aw.

148 Mahimong pangutan-on ko ninyo karon, “Nganong gitugotan man Niya nga idisenyo nga ingon niadtong ang babaye?” Dili ko unta gustong mogahin og dakung oras, tungod daghan pa ako’y kinahanglan nga isulti dinhi. “Ngano,” tingali’g ipangutana ang ingon-ini nga pangutana pagkahuman, “nganong gibuhat man sa Dios kining tawong babaye nga mamaingon niana? Nganong gitugotan man Niya siya nga mamaingon niana?” Tungod kadto sa Kaugalingon Niyang maayo nga katuyoan. Oo.

149 Karon kung gusto n'yong ablihan ang inyong Biblia sa makadiyut, atong ablihan sa Mga Taga-Roma 9, sa makadiyut lang, ug ipakita kaninyo ang usa ka butang, kung sa unsang paagi ginabuhat sa Dios kining mga butanga, kung gusto ninyo nga—nga basahon kini. Ug makita nato dinhi kung unsay ginabuhat sa Dios alang sa Kaugalingon Niyang maayo nga katuyoan. Mga Taga-Roma 9:14.

Nan *unsa ma'y atong ikasulti?*

*May pagkadili-matarung ba diha sa Dios? . . .*

150 Sa dihang gipili Niya si Esau kaniadto, o gipili si Jacob ug gisalikway si Esau, sa wala pa man makabaton og katungod sa pagpili bisan ang usa sa duha ka batang lalaki, mismo, ni ang usa man kanila; sa wala pa sila maipanganak, nga atua pa lang sulod sa tagoangkan sa ilang inahan, miingon na ang Dios, “Gidumtan Ko si Esau, ug gihigugma Ko si Jacob.” Kita n'yo? Ngano man?

*Kay siya miingon kang Moises, malooy ako niadtong akong pagakaloy-an, ug magmapuangoron ako niadtong akong hatagan sa puangod.*

*Busa dili kini . . . sa kabubut-on sa tawo, o . . . kaniya nga nagapaningkamot, kondili ang Dios kini nga nagapakita og kalooy.*

*Kay ang kasulatan nagaingon kang Faraon, Tungod niini gayud nga katuyoan gibangon ko ikaw, aron diha kanimo igapahayag ko ang akong gahum, ug aron ang akong ngalan igamantala sa tibuok nga yuta.*

*Busa . . . siya (Karon matikdi n'yo dinhi) . . . busa . . . nagakalooy siya niadtong buot niya nga kaloy-an, ug siya nagapatig-a kang bisan kinsa nga buot niya.*

*Moingon ka . . . kanako, Nganong siya kung ingon-ana . . . mobasol pa? Kay kinsa ba ang misukol sa iyang kabubut-on?*

*Apan, Oh tawo, kinsa ka ba nga nagayubit sa Dios? Makaingon ba ang binuhat sa nagbuhat kaniya, Nganong gihimo mo ako nga ingon niini?*

*Ang magkokolon wala ba'y gahum sa lapok, gikan sa maong inumol sa pagbuhat og usa ka sudlanan para sa kadunganan sa usa ka bahin, ug ang usa pa para sa kaulawan sa laing bahin?*

*Unsa kaha kung ang Dios, buot magpahayag sa iyang kaligutgot, ug sa pagpaila sa iyang gahum, mag-antus . . . sa ingon-anang pagkamapailubon sa sudlanan sa kaligutgot nga andam na sa pagkalaglag,*

*. . . aron ikapaila niya ang mga pagkadato sa iyang himaya sa ibabaw sa sudlanan sa kalooy, nga giandam na niyang daan alang sa himaya,*

<sup>151</sup> Karon pakiglantugi mo Niana sa makadiyut. Gibuhat kadto sa Dios! Kinahanglan Niyang buhaton kadto nga ingon niadto. Kinahanglan nga maanaa kini didto. Karon paminaw. Karon sulod sa mga lima ka minuto, gusto ko nga awhagon ang inyong pagtagad para sa usa ka butang.

<sup>152</sup> Unsa ba ang Dios? Ang Dios mao ang gamhanang Eternal. Sa sinugdan, kaniadtong wala pa magkaaduna og sinugdanan, Siya kaniadto dili pa gani Dios. Nasayod ba mo niana? Ang *Dios* mao'y usa ka "butang nga silimbahon," ug wala gayu'y bisan unsa pa kaniadto aron mosimba Kaniya. Nagpuyo Siya kaniadto nga nag-inusara.

<sup>153</sup> Ug diha Kaniya dunay mga kinaiyahan. Unsa man ang kinaiyahan? Usa ka hunahuna. Karon masabtan ninyo ang usa ka butang nga dunay kahilambigitan sa atong hilisgotanan unyang gabii. Matikdi, Siya mao ang Iyang mga kinaiyahan nga anaa Kaniya kaniadto. Bueno, anaa Kaniya ang pagka-Amahan, anaa Kaniya ang pagka-Dios, anaa Kaniya ang pagka-Anak, anaa Kaniya ang pagka-Manluluwas, anaa sab Kaniya ang pagka-Mananambal. Ug ang tanan niining mga butang dinhi nagapasundayag lang sa Iyang mga kinaiyahan. Walay unsa man nga wala sa kahan-ayan. Sa hunahuna n'yo ba wala makita sa Dios ang katapusan gikan sa sinugdanan? Sigurado gyud, nakita na Niya. Wala gayu'y bisan unsa nga wala sa kahan-ayan, kondili ginapakita lang niini ang Iyang mga kinaiyahan.

<sup>154</sup> Karon, dili Siya mamahimong *matarung* ug himoon nga mahulog ang tawo. Kinahanglan Niya 'unang ipahimutang ang tawo sa parehas nga basihanan, nga may gawasnon nga kinaugalingong kabubut-on, aron mohimo sa kaugalingon niini nga pagpili, bisan pa hingsayran na Niya nga mahulog ang tawo.

<sup>155</sup> Karon, dili Siya mamahimong Manluluwas gawas kon adunay mawala. Dili pud Siya mamahimong Mananambal gawas kon adunay masakiton. Kinahanglan nga mamaingon niana gyud kining mga butanga. Gihimo sila sa Dios nga ingon niadto aron nga maipasundayag ang Iyang halangdon nga mga kinaiyahan. Kung walay ingon niadto, nan wala unta Siya nahimong usa ka Manluluwas. Apan nasayod kita nga Siya'y ingon na niana, bisan sa wala pa magkaaduna og panahon kaniadto, Manluluwas na Siya. Usa Siya ka Manluluwas, busa kinahanglan nga aduna gyu'y mawala. Unsaon man pagkahitabo niini?

<sup>156</sup> Kung kuhaon Niya ug walaon ra kini, aron lang luwason kini, nan dili makatarunganon ang Iyang paghukom. Dili Niya puedeng ilabay ang usa ka tawo ngadto sa impiyerno, ug mamahimong *matarung*. Siya'y buutan, maaghop, tinuod, matinud-anon, ug usa Siya ka halangdon nga Maghuhukom. Kita n'yo, mamahimo hinoon Siya nga namuhat nga batok sa Iyang Kaugalingon.

157 Busa kinahanglan Niyang ipahimutang dinhi ang tawo, ug hatagan siya og gawasnon nga kinaugalingong kabubut-on, aron siya, bisan nga hingsayran na, mahulog gihapon; ug ang tawo, nga anaa sa Kaugalingong dagway sa Dios, sa unsa mang paagi diay nga mahulog siya? Karon makita na ba ninyo ang Kahayag sa adlaw? Busa, kinahanglan Niyang mohimo og usa ka binuhat nga gikan sa orihinal, usa ka butang nga gikan sa orihinal nga linalang. Karon nasabtan na ninyo kini. Kita n'yo? Mao kana. Kita n'yo? Dayon, mao kana ang nahulog. Gihimo Niya kana, nga nanghibalo na nga mahulog kana. Ug gitugyan kana sa mga kamot ni Satanas, ingon nga usa ka sudlanan sa kaulawan. Asa man nakapahinungod ang kadungganan karon? Hunahunaa n'yo kana. Matikdi n'yo pag-ayo karon.

158 Kung ingon-ana usab, nganong gidisenyo man siya nga ingon niini ug dili nga sama sa ubang mga babaye, nganong ang tawong babaye man ang gidisenyo nga ingon niadto ug dili ang ubang mga babaye? Wala ma'y ni usa sa ubang mga babaye ang gidisenyo nga sama niadto. Dili sila ingon niana, bisan sa karon. Dili man sila makahimo. Kung wala pud gihimo ang tawong babaye nga ingon niadto, nan dili pud niya mabuhat kadto. Nganong wala man gihimo sa Dios kining babaye kaniadto, ang tawong babaye, nga sama sa uban pang mga babaye, aron mamahimo pud siyang ingon niadto, nga makabaton lang og mga anak? Ingon nga magkaaduna siya'y bana, ug magkinabuhi; ug pagmoabot na ang panahon nga makabaton siya og anak, manganak ra siya. Ngano—nganong wala man Niya gihimong ingon niini ang tawong babaye?

159 Dili ko mahimong isulti kini nga mga pulong. Ug nasabtan man ninyo kung unsay akong ginahisgotan, dili ba? Kung nakasabot kamo, moingon mo og “amen.” [Nagaingon ang kongregasyon, “Amen.”—Ed.] Oo. Kita n'yo? Aduna man gud og mga batan-ong babaye nga nagalingkod dinhi, ug mga batan-ong lalaki, usab. Apan kabalo na mo, nga ang hayop kinahanglang moabot pa sa usa ka pihong panahon sa tuig, ug ang iyang kaparis usab, dayon kana lang. Apan, sa tawong babaye, bisan unsa nga oras kana. Ug nganong gihimo man Niya siya nga ingon niini?

160 Karon matikdi n'yo ang Iyang halangdong programa nga ginapadayag, samtang ginapadayon nato kini karon, sa ingon ka eksakto gayud. Wala ako mahibalo niini hangtud niadtong miaging adlaw lang.

161 Nganong wala man Niya gihimo ang tawong babaye nga ingon niadto sa sinugdan, sama sa tanang uban pang mga babaye nga Iyang gilalang? Tungod kay dili na kadto angay alang Kaniya. Siya man mao ang Tinubdan sa tanang kaputli. Mao kadto'y hinungdan nga kinahanglan Niyang tugotan si Satanas nga malimbongan ang babaye, og kung unsay gibuhat ni Satanas nga pagpangtuis kaniadto. Ang ingon niadto man gud

nga linalang mamahimong, mamahimo nang dili angay alang Kaniya, sa orihinal nga pagdisenyo.

<sup>162</sup> Ang tanan Niyang mga buhat nga Iyang gidisenyo, sa orihinal, anaa sa kahan-ayan. Ang tanan Niyang orihinal nga mga buhat anaa man sa kahan-ayan. Ang babayeng iro, sa laking iro; kita n'yo, ang babayeng baka, sa laking baka; ang tanan-tanan anaa gyud sa kahan-ayan. Ang tibuok kinaiyahan anaa pud sa kahan-ayan. Pagnamatay ang binhi, malubong diha sa yuta; sama lang sa kamatayon, paglubong, og pagkabanhaw. Nagakanaug ang tagok gikan sa kahoy, pagnagakahulog ang dahon niini, og mobalik na pud sa sunod nga tuig pinaagi sa pagkabanhaw sa usa na usab ka bag-ong dahon. Nasabtan n'yo ba ang buut kong ipasabot? Ang tanan-tanan, bisan ang kinaiyahan, sa Dios, anaa gayud sa kahan-ayan, diha sa pagkausa; ug ania ang usa nga gidisenyo nga gawas sa kahan-ayan sa Dios. Ingon niadto ang pagkadisenyo sa kinaiyahan aron dili kadto makasala. Palandunga ninyo! Ang orihinal nga mga linalang, sa Dios, dili gyud mahimo nga makasala.

<sup>163</sup> Oh, dili ba ninyo kini makita karon, sa ingon ka klaro, ang pagkatuis sa iglesia? Ang orihinal mao man ang Pulong sa Dios! Wala gayu'y sala diha sa Dios. Nasabtan n'yo ba ang buut kong ipasabot? Ania ang usa ka linalang nga mitungha pinaagi sa pagpangtuis. Magkaaduna ang Dios og usa ka Iglesia, apan tan-awa n'yo kining tinuis nga butang nga aduna sila dinhi.

<sup>164</sup> Ang Dios adunay lalaki ug babaye. Apan, kining tawong babaye, kita n'yo, ang mismong mga timailhan niini nagapakita lang kung unsa ang anaa sa hunahuna sa Dios kaniadto. Mahimo kitang mogahin og usa ka oras, o duha, ug susihon kana. Ang babaye...Gihimo kini nga linalang para niana, gihimo sa Dios ang maong linalang ug gihimo siyang ingon niadto aron makuptan siya ni Satanas, ug nakuptan gyud niya. Ginakuptan niya siya sa gihapon. Mao nga kinahanglan gyud niyang mokalagiw paingon sa Krus, sama sa lalaki, usab.

<sup>165</sup> Himatikdi, ang tibuok kinaiyahan anaa gayud sa kahan-ayan. Kung gibuhad sa Dios ang tawong babaye kaniadto nga pareho ra sa orihinal nga mga linalang, nan wala unta'y sala, tungod kay dili man niya buhaton kadto, dili man niya mabuhad kadto. Siya'y usa lamang ka pagtuis sa orihinal nga paglalang.

<sup>166</sup> Mao nga ang tanang sala usa lang ka pagtuis sa orihinal nga Kamatuoran! Unsa man ang bakak? Mao ang Kamatuoran nga gituis lang. Unsa man ang pagpanapaw? Mao ang husto nga buhat nga gituis lang. Busa mao pud kana ang tinuis nga linalang, mao kana ang tinuis nga tibuok butang. Ug malitok ang maong tibuok butang nga s-a-l-a, nga anaa karon mismo. Mao kana kon nganong importante kaayo ang maong pangutana.

<sup>167</sup> Usa lamang ka bahin, diyutay'ng bahin, ang gihimo gikan sa lalaki, aron limbongan ang lalaki pinaagi niini; gihimo kana

sa Dios, og napamatud-an kana dinhi mismo. Mao kana kon nganong gihimo ang babaye.

<sup>168</sup> Ang usa ka imoral nga babaye mao na ang pinakaubos nga binuhat nga mahunahuna mo, sa kalibutan. Pasayloa ko niini, mga batan-ong babaye. Siya wala na’y lain kondili usa tawong basurahan, usa ka pagpasundayag sa pakighilawas. Ingon-ana ra gyud siya, ang usa ka imoral nga babaye, usa ka tawong basurahan sa pakighilawas, usa ka kahugawan, kon diin ang malaw-ay, mahugaw, dautan, og talamayon nga kalaw-ayan ginasalibay diha kaniya. Para sa unsa ba nga gihimo siyang ingon niini? Alang sa pagpanglimbong. Tawong babaye ang naghinungdan sa tanang sala nga anaa sa kalibutan.

<sup>169</sup> Ug usa ka analyst nga taga-Chicago, usa—usa ka babaye ang nagsulat niini nga artikulo, sa puwersa sa kapulisan, nga nasuta kono nila, sa Estados Unidos, diha sa mismong pinaka-sentro sa Estados Unidos, nga, “Nubenta’y-otso porsyento kono sa tanang krimen nga nabuhat sa bisan unsa man nga matang, sa Estados Unidos, aduna kono’y usa ka babaye nga nahilambigit niini o kaha nagpahinungdan niini.”

<sup>170</sup> Karon ginasulti ko lang kining tanan, aron maipasabot ang usa ka butang dinhi sa katapusan, aron nga inyong makita kung unsa ba gyud ang problema.

<sup>171</sup> Gihimo ang tawong babaye aron manglimbong, sama sa gibuhat niya kang Adan sa sinugdan kaniadto, gisultihan si Adan nga ang bunga kono makalipay, ug uban pa, aron limbongan siya ug ipahilayo siya sa Pulong. Ingon niana sab ang ginabuhat sa iglesia karong panahona, mao gihapon.

Apan, pagkahuman niadto, ang lalaki na ang nahimong nangulo kaniya, aron mao’y mangulo kaniya.

<sup>172</sup> Karon pagkalahi gayud kay sa niining panahona, sa panghunahuna sa niini nga panahon. Imbis nga ang lalaki unta ang mao’y mangulo sa babaye, ang babaye na hinoon ang nahimong dios sa lalaki. Oo, siya na ang nangulo sa lalaki. Karon tingali’g nasabtan na ninyo og ayo kung unsa ang dugay ko nang ginasaway. Tungod sa iyang kaanyag ug sa iyang pagkontrolar sa pagpakighilawas, sa iyang kurba nga gikahatag kaniya ni Satanas, ang resulta tungod sa paghilabot kaniya ni Satanas, og gipadala siya aron limbongan ang mga anak sa Dios. Ug mahimo niyang ipahisalaag ang daghan pa kanila paingon sa impiyerno kay sa unsa mang uban pa nga instrumento nga aduna si Satanas. Eksakto gayud kana.

<sup>173</sup> Ang mga imoral ang ginahisgotan ko ha, dili kamong mga igsoong babaye. Ihatag namo ang inyong puwesto, husto nga puwesto, sa pipila ka minuto, dinhi sa Pulong sa Dios. Anaa na kadto sa plano sa Dios sukad pa sa sinugdan—sinugdanan.

<sup>174</sup> Karon sa karong panahona, unsa ba ang dios sa Estados Unidos? Mahinumduman n’yo ba didto sa tabernakulo pila na ka



tuig ang milabay, nga nagwali ako mahitungod niana? Ang dios sa niining moderno nga panahon, mao'y usa ka gamay'ng kiatan nga nagalingkod dinha nga nakameyk-ap, ug ang iyang sinina taman ra sa ibabaw sa iyang mga tuhod, ug mga ingon nianang butang. Ingon ko, "Tan-awa ang inyong dios!" Ug husto kana, anaa na mismo siya sa tanan nga mga komersiyal, nga halos hubo na. Anaa pud siya sa dalan, nga mao gihapon.

<sup>175</sup> Siya mao ang instrumento ni Satanas, "sukad pa sa sinugdan," ang ingon ni Jesus. Kita n'yo? Makita man nato nga ingon na gyud niana karon, ug "sukad pa sa sinugdan," ug mao gyud ang ginahisgotan sa Dios.

<sup>176</sup> Bueno, gihimo kaniadto ang babaye nga dios sa mga pagano, (nasayod ba mo niana?) ingon nga usa ka diosa. Tinuod gyud. Gihimo nila siya nga usa ka diosa, tungod aduna gani sila og pagpakighilawas diha sa ilang pagsimba. Gipamahayag nila nga, "Siya kono ang magbubuhat. Sulod sa iyang tagoangkan gisamkon niya kono ang binhi ug naglalang." Bakak kana. Adunay usa lang ka Magbubuhat, kana mao ang Dios. Apan mahinumduman ba ninyo si Pablo kaniadto? "Si Diana, sa Efeso," nga usa ka rebulto nga bato, gikaingon nga, "ang diosa sa Langit, nga mikanaug." Dili ba ninyo makita kung unsa ang paagi sa pagsimba sa mga pagano?

<sup>177</sup> Ug kita, nga wala nanghibalo niini, nagabalik ta mismo sa pagano nga pagsimba, pagsimba ngadto sa mga babaye, ang pinakaubos nga linalang sa yuta, pagsimba-sa-babaye! Ipahisalaag niya gani ang lalaki sa unsa mang paagi nga gusto niya. Ug wala nanghibalo, nga sa tanan nianang kaanyag diha sa gawas, impiyerno diay ang anaa diha sa sulod. Miingon si Solomon, "Siya, ang iyang mga ganghaan mao'y mga ganghaan paingon sa impiyerno."

<sup>178</sup> Karon makita nato sa ingon ka tataw dinhi kung unsa ang gihisgotan ni Jesus diha sa Pinadayag, sa ika-2 nga kapitulo ug sa ika-15 nga bersekulo, mahitungod sa doktrina sa mga Nicolaita, ang nagasingabot nga pagpahilayo mismo niana nga iglesia gikan sa Pulong.

<sup>179</sup> Usab makita nato dinhi, sa ingon ka tataw, kining mga malaw-ay, dautan, mahugaw'ng mga programa nga aduna kita sa telebisyon, mahatungod sa mga sex queen sa Hollywood. Makita pud nato ang kalaw-ayan niini nga siyudad, sa diha nga kining mga kabataan, mga batan-ong babaye nga nagaadto-nganhi sa dalan dinhi, nga nagasul-ob og mugbo kaayong, hugot nga mga sinina, nagakiaykiay pa, ug tugnaw pa gyud kaayo nga halos mamatay na sila sa katugnaw. Wala sila nakahibalo nga ang yawa diay kana ang nagabuhat niana. Naulipon man gud sila sa usa ka dautan nga espiritu, ug wala mahibalo niini! Dili ka man makakita og usa ka babayeng iro nga nagabuhat og ingon-ana, di ba? Dili gyud ka makakita og unsa mang uban pa

nga babaye nga nagabuhat og ingon niana, ug wala pud og mas maayong lalaki ang makigkuyog kaniya, man lang.

<sup>180</sup> Kita n'yo, karon nahulagway na ba ninyo? Aduna kita'y butang nga ipresentar sa makadiyut lang, kon itugot sa Ginoo.

Karon nakita n'yo na ang mga Nicolaita, nakita n'yo na ang ilang doktrina.

<sup>181</sup> Makita ninyo ang mga batan-ong reyna, ang tawag nila sa mga niini, niining mga nagahubo-hubo diha sa kadalanan. Kaniadto kinahanglan mo pa nga moadto sa unsa mang malaway nga pasundayag sa kon asa man, aron makakita og mga paghubo-hubo. Ibuka mo lang ang imong mga mata, og motanaw diha sa dalan, mao lang kana ang kinahanglan mong buhaton karon. Ang maong tibuok butang mga paghubo-hubo na gyud. Oo. Para sa unsa man nga ginabuhat nila kana? Aron mangdani, manintal, mao lang kana ang rason nga ginabuhat sa babaye ang ingon-ana. Ginabuhat niya kana tungod kay malaw-ay siya. Ginabuhat niya kana tungod kay gihimo man siya nga ingon niana. Wala siya nakahibalo nga usa na diay siya ka instrumentong diha sa mga kamot ni Satanas, ug ingon niana gayud siya.

<sup>182</sup> Bisan sa atong mga tulonghaan karong panahona, nagatudlo na sila og pagpakighilawas. Tungod sa dautan na natong kalibutan nga nagasimba og babaye! Nasayod ko nga dili nila gustong toohan kana. Motindog sila ug moawit sila sa simbahan og usa ka matang sa alawiton, ug uban pa, sa adlaw; ug makigkuyog-kuyog sa mga babaye, magbirig-birig, sa tibuok gabii. Kita n'yo? Oo. Sa diha nga, sa atubangan sa Dios, sa Pulong, ang babaye man ang pinakaubos sa tanang mga hayop nga gipahimutang sa Dios sa kalibutan. Matikdi.

<sup>183</sup> Mao kana kon nganong gidid-an sa Dios ang babaye nga magtudlo sa Iyang Pulong. Husto kana. Unang Timoteo 2:9-15, "Dili ako motugot nga ang babaye magpanudlo, o magkaaduna og unsa man nga kagahum." Kita n'yo? Ug usab Unang Mga Taga-Corinto 14:34, "Ang mga babaye kinahanglan magpakahilum sulod sa mga iglesia, kay wala itugot kanila ang pagsulti, kay kinahanglan magpakahilum lamang sila; sumala usab sa ginaingon sa Kasugoan." Apan, karong panahona, unsa ma'y ginabuhat sa iglesia? Ginahimo hinoon nila siya ingon nga mga pastor, mga ebanghelista, sa diha nga bug-os kining ginadili sa Biblia. Ug miingon ang Biblia, "sumala usab sa ginaingon sa Kasugoan," nga ginapatakdo, ang maong tibuok butang.

<sup>184</sup> Sama sa Cordero, kagabii, ingon nga mao lang ang bugtong dapit sa pagsimba, ilalum sa giula nga Dugo sa Cordero. Mao lang kini ang bugtong dapit karong panahona, diha kang Cristo. Ang butang lamang nga inyong buhaton mao ang pagduol Kaniya. Mao lang kana ang bugtong dapit alang sa pagsimba. Ingon na niana kini sa una pa. Ang bugtong dapit alang sa pagsimba mao'y diha ilalum sa giula nga Dugo.

185 Busa karon makita na nato ang tibuok hulagway niini nga nahipadayag kanato. Mao kana ang babaye. Mao kana kon nganong wala siya ginatugotan sa Dios nga magpanudlo, wala siya ginatugotan nga magbuhat og bisan unsang butang sulod sa iglesia kondili magalingkod lang nga tinabonan ang nawong.

186 Karon nasabtan na ba ninyo kon nganong gisulti ko ang mga butang ug gibuhat ang mga butang nga akong nabuhat, nga hingsayran ko ang tanan niini anaa na sa akong kasingkasing, igsoong lalaki, mga igsoong babaye? Nasayod ko, mga igsoong babaye, nga ako’y...aduna man kamo’y inyong lugar (sa makadiyut na lang), ug ang maanindot nga kinaiya nga mahimong hulmahon sa Dios diha kaninyo. Apan gipaningkamotan ko lang usá nga hisgotan ang pikas bahin, aron maipakita kung unsa gyud kamo gikan, “sa sinugdanan.” Gisultihan man kita sa Dios nga “balikan ang sinugdanan,” aron mahibaloan kini. Mao kana ang ginabuhat nato.

187 Karon gikinahanglan kong iklaro ang mga mahinungdanong punto bahin sa kadaghanan niini, ug nagalaum ko nga masabtan ninyo kini. Ug kamong mga tawo nga magapaminaw niini nga teyp, nagalaum ko nga masabtan pud ninyo. Baliki lang. Kini’y aron lang ipakita nga miingon si Jesus, “Balik, gikan sa sinugdanan, ug hibaloa.” Ang tanang mga butang, nagabalik gyud sa sinugdanan. Makita man ninyo, sa karon.

188 Aba, ang mga tawo, nagaingon sila nga usa kono ako ka madulomtanon sa mga babaye. Halayo ra kana sa Kamatuoran. Dili ako ingon niana. Ang tawag nila, “Usa ka madulomtanon sa mga babaye.” Hinumdumi, gitawag pud nila si Pablo kaniadto nga usa ka madulomtanon sa mga babaye. Usa ka babayeng ministro, dili pa lang dugay, ang miingon, “Oh, sama ra ka kang Pablo kaniadto, ang ginabuhat lang niya mao ang pagsaway kanamong mga babaye.”

189 Usa ka balaan sa Dios, nga gikatugotang isulat ang Biblia, ang Bag-ong Tugon, ug makiglantugi ka sa iyang mga Pulong? Ingon niya, “Kung ang usa ka Manulonda gikan sa Langit magatudlo og ubang butang gawas Niining ako nang gisulti, ipatunglo Siya,” unsa pa kaha ang usa ka babayeng magwawali.

190 Ingon pud nila nga si Elias kono usa ka madulomtanon sa mga babaye. Dili man siya madulomtanon sa mga babaye, sa tinuod nga mga babaye. Dili lang gyud niya gusto kadtong mga Jezabel.

191 Ug kung ingon niana man, nan siguradong ingon niana usab ang Dios, tungod kay Siya man mao ang Pulong nga nagaabot sa mga propeta. Busa ang Dios siguradong, ingon niana, usab, kita n’yo, nasayod Siya sa orihinal nga paglalang, “sukad sa sinugdan,” miingon Siya, “sukad sa sinugdan.” Sila’y mga propeta kang kinsa nagaabot ang Pulong.

<sup>192</sup> Ug gihimo Niya ang babaye para sa lalaki, ug dili nga ang lalaki para sa babaye. Nasayod ba mo niana, nga, “Ang babaye gihimo para sa lalaki, ug dili nga ang lalaki para sa babaye”? Pila man ang nasayod niana? Ginatudlo kana sa Biblia. Oo. Gihatagan kaniadto ang babaye og lugar diha sa lalaki, sa wala pa ang pagkahulog, nga kahisama sa tanang linalang. Apan “human” sa pagkahulog, karon hisgotan na nato dinhi ang maong hilisgotanan. Apan “human” sa pagkahulog, ang lalaki na ang nangulo kaniya, mao nga kinahanglan na niyang magpakahilum sa tanang mga butang, human kaniadto nga natapos ang orihinal nga sinugdanan.

<sup>193</sup> Miingon si Jesus, “Sukad sa sinugdanan dili ingon niana.” Kaniadtong nagsugod ang panahon, sa dihang unang gihimo sa Dios kini diha sa Iyang orihinal nga paglalang. Ang tanan nga nakasabot, moingon og “amen” pag-usab. [Nagaingon ang kongregasyon, “Amen.”—Ed.] Sa sinugdan nagbuhat ang Dios og usa lang ka lalaki ug usa pud ka babaye. Apan ang tawong babaye gihimo nga lahi kaysa mga hayop, kaysa tanang uban pa nga mga hayop, para sa pagpanglimbong. Karon matikdi n’yo ha, “Sukad sa sinugdanan dili ingon niana.” Gihimo siya, og kung nagpabilin lang siya sa orihinal nga kahimtang, wala unta siya nahulog. Busa siya ang nagpahinungdan sa pagkahulog ug sa pagbalda nga mao’y nagguba sa tibuok kahan-ayan sa Dios, ug nagpahinungdan sa kamatayon, kagul-anan, ug tanang uban pa, sa kalibutan. Gihimo man siya nga ingon niadto.

<sup>194</sup> Karon matikdi. Bueno, *human* sa sinugdanan, *human* sa sinugdanan, *human* sa pagsugod sa panahon; nga sa wala pa kana, mao ang Eternidad, nga nahuman na. Matikdi, human niadtong pagkahulog nga gihimo ni Eva, human sa pagkahulog, kinahanglan nga maghimo na pud og usa pa ka pakigsaad. Karon mahimong makapandol kini kaninyo, apan ihatag ko kaninyo ang maong Kasulatan aron pamatud-an nga Kamatuoran kini. Karon matikdi nga human sa pagkahulog, miingon si Jesus. . . ang Dios, sa sinugdanan, naghimo og usa sa usa ra ka matang; apan karon, human sa pagkahulog, karon molagpas pa kita niana. Ang pakigsaad kaniadto mao nga managsama ra; apan karon, human sa pagkahulog, adunay usa na usab ka pakigsaad ang gihimo. Karon dili na siya tigpangulo uban sa lalaki, ang matag usa kanila kinahanglan nang magkaaduna og managlahi nga pakigsaad.

<sup>195</sup> Karon atong tan-awon kung husto ba kana. Atong basahon ang Genesis 3, ug hibaloong kung husto ba kini, karon samtang nagapadayon kita, tungod kay gusto gyud nato nga mahimong sigurado mahitungod niining mga butanga, gikatudlo na ang mga niini ug gipahayag nga tinuod gayud. Busa tingali’g dinhi niini mismo aduna pa kita’y diyutay’ng oras, tungod dili na man ta ingon ka halayo sa pagtapos karon, og sa pagpaingon sa paghinapos nga bahin sa maong hilisgotanan, aron ipakita

*kung ngano ug kung unsa* ang mahitungod sa mga panagbulag, ug uban pa. Bueno diha sa Genesis sa ika-3 nga kapitulo, ug magsugod kita karon diha sa ika-3, ug sa ika-16 nga bersekulo. Sugdan nato sa ika-14 nga bersekulo.

*Ug ang GINOO...nag-ingon sa bitin,* (karon pagatunglohon na Niya kini), *Tungod kay ikaw—ikaw nagbuhat niini, tinunglo ikaw labi pa kay sa tanan nga mga kahayopan, . . .labaw sa tanan nga mga mananap sa kapatagan;* ug *sa imong tiyan magakamang ka, ug nga magakaon ikaw sa abog sa tanan nga adlaw sa imong kinabuhi:*

*Ug ibutang ko ang panagkaaway sa taliwala mo ug sa babaye, ug sa taliwala sa imong kaliwat ug sa kaliwat sa babaye; ug siya magasamad sa imong ulo, ug ikaw magasamad sa iyang tikod.* (Ang saad, “nga moabot pinaagi sa babaye,” ang maong Mesias, nga maoy magatubos.)

*Nag-ingon siya sa babaye, . . .*

<sup>196</sup> Karon matikdi, bueno mao kana ang pakigsaad diha sa serpente. Diin, okey pa ang tanan kaniadto, sa sinugdanan, o sa wala pa ang sinugdanan.

*Nag-ingon siya sa babaye, pagadaghanon ko sa hilabihan gayud ang imong mga kasakit ug ang imong pagpanamkon; ug sa kasakit ikaw magapanganak og mga anak; ug ang imong tinguha mao ang pagpangandoy sa imong bana, ug siya magabuot kanimo, (Dili na gayud sila kapareho.)*

<sup>197</sup> Sa karon baliktad na siya, ug ang babaye na ang tigpangulo.

*Ug miingon siya kang Adan, Tungod kay gipatalinghugan mo ang tingog sa imong asawa, ug nagkaon ka sa kahoy, nga gisugo ko kanimo, sa pag-ingon, Dili ka magkaon. . .niini: tinunglo ang yuta (wala gitunglo si Adan, ha) tinunglo ang yuta tungod kanimo; pinaagi sa kahago magakaon ka gikan niini sa tanang mga adlaw sa imong kinabuhi;*

*Mga sampinit . . .ug mga kadyapa ang igaturok niini kanimo; ug magakaon ka sa mga hilamon sa kapatagan;*

*Ug sa singot sa imong nawong nga magakaon ikaw sa tinapay, hangtud nga magabalik ka sa yuta; tungod kay gikan niini—gikan niini gikuha ikaw: kay abog ka, ug sa abog ikaw mopauli.*

<sup>198</sup> Duha ka pakigsaad. Bueno kana ang nagatapos “sa sinugdanan,” nga giingon ni Jesus, “Sukad sa sinugdan dili ingon niana.” Aduna na kita og usa pa ka pakigsaad karon. Himatikdi, nga usa kini ka lahi nga pakigsaad. Karon aduna man gud og usa ka pakigsaad para sa orihinal nga binuhat, ug sa binuhat lang

gikan sa orihinal. Matikdi, nga ang pagkahulog naghinungdan og problema, kamatayon, sa matag linalang sa kabuhatan, nga naghimo og kalahian sa tibuok kinaiyahan. Karon matikdan nato kung unsay giingon ni Jesus mahitungod sa, “sukad sa sinugdan dili ingon niana.” Bueno dili ingon nga ingon niana “sukad sa,” kondili kini karon mao na’y “human” sa sinugdanan. Karon aduna na’y duha ka pakigsaad.

<sup>199</sup> Ang una kaniadto mao’y usa ka pakigsaad, nga si Adan ug si Eva kapareho, usa ka lalaki ug usa ka babaye. Bueno sa nakasala ang babaye, ug (unsa ma’y gibuhay niya?) nga naghulog kanilang tanan ngadto sa kamatayon, ug mao nga gikinahanglan sa Dios nga mohimo og usa ka pakigsaad tungod niadto, usa na pud ka pakigsaad. Ania kini mismo dinhi sa Genesis 3:16, nga naghimo ang Dios og usa pa ka pakigsaad.

<sup>200</sup> Karon kinahanglan nga mapadaghan ang mga tawo sa kalibutan, dili pinaagi sa orihinal nga paglalang sa Dios, sama sa sinugdanan kaniadto, dili pinaagi sa orihinal nga paglalang, kondili pinaagi og pangibog sa pakighilawas. Karon mao kana ang nagtapos “sa sinugdan,” dili ba? Sa sinugdan aduna lamang og usa ka tawong lalaki ug usa pud ka tawong babaye, usa ka lalaki ug usa pud ka babaye; apan sa dihang milagpas ang tawong babaye niadtong utlanan ug naghatud niining kasal-anan, karon kinahanglan nga mapadaghan ang mga tawo sa kalibutan, pinaagi sa pagpakighilawas, dili na pinaagi sa paglalang; kondili pinaagi sa pagpakighilawas. Nakita n’yo na ba kung asa ang babaye karon? Karon, apan sa ingon na niana nga paagi nga mapadaghan ang mga tawo sa kalibutan sa karon, pinaagi sa mga kababayan-an.

<sup>201</sup> Mao kana’y hinungdan nga kinahanglan ni Jesus nga moabot pinaagi sa babaye, aron ipahibalik kini pag-usab sa orihinal nga sinugdanan niini, nga walay pangibog sa pakighilawas. Gipanganak man Siya sa ulay. Apan, alleluyah, moabot ang panahon nga wala na’y pagpakighilawas, kondili pagatawgon na lang sa Dios ang Iyang mga anak gikan sa abog sa yuta, sama kanila kaniadto sa orihinal, dili nga pinaagi sa kinsa mang babaye; kondili pinaagi sa paghulma og lapok ug mga cosmic light, ug petrolyo, maglalang Siya pag-usab sama sa paglalang Niya kang Adan kaniadto. Gihimo na kining posible ni Jesus, pinaagi sa Dios nga gihimo ang Iyang Kaugalingon ingon nga usa ka Tawo ug mianhi sa kalibutan aron mahimo Siyang mamatay, pinaagi niining babaye. Sa karon mao kini ang panahon sa pagsulay, tungod sa sala.

<sup>202</sup> Karon nakita n’yo na, “human” sa sinugdanan, dunay usa pa ka butang nga nasugdan. Karon mahimong makapakurat kini kaninyo. Gipangkapoy na ba mo? [Nagaingon ang kongregasyon, “Wala.”—Ed.] Pabilin lang mo sa paglingkod sa makadiyut na lang.

203 Dayon sa dihang gihimo ang ikaduhang pakigsaad sa tawong lalaki ug tawong babaye, tungod sa pagpakighilawas, lahi na nga pakigsaad sa kinatibuk-an (dili na ang orihinal nga pakigsaad, kondili usa na ka lahi nga pakigsaad), bueno unsa man kanang bag-o na usab nga gisugdan? Ang pagpangasawa og daghan, sa tanan. Mao nga, human sa sinugdanan, nagsugod na ang pagpangasawa og daghan parehong diha sa tawo ug sa mga hayop; pagkahuman sa sinugdanan, human sa pagkahulog. Ang Dios karon, human niadto, nagpahimutang pag-usab og bag-ong kinaiyahan, pinaagi na og pagpakighilawas. Gilalang man sa Dios ang pinakaunang kinaiyahan nga walay pagpakighilawas. Nagatoo ba mo niana? Karon usa na usab kini ka pakigsaad sa kinaiyahan, kon diin nagpahimutang ang Dios og lahi nga kahan-ayan, pinaagi na og pagpakighilawas. Ang ikaduhang pakigsaad: usa ka lalaki, sa daghang mga babaye; usa ka laking lagsaw, sa usa ka hugpong nga mga babayeng lagsaw. Husto ba kana? Usa ka toro, sa usa ka panon sa kabakahan, mga baka; usa ka sunoy, sa nataran nga puno og mga himongaan. Husto ba kana? Usa ka David, nga uyon sa kasingkasing Mismo sa Dios, adunay lima ka gatus ka mga asawa; og dunay usa ka gatus ka mga anak ang nahimugso tungod kaniya, sa usa ka tuig, sa nagkalainlaing mga babaye, um-hum, usa ka tawong tukma sa kasingkasing Mismo sa Dios. Usa ka Solomon usab, nga adunay usa ka libo ka mga asawa. Apan matikdi karon, dili man ingon niana sa sinugdanan, kondili kini karon mao na ang “human” sa sinugdanan. Ang tawong babaye man ang nagbuhat niini, mao nga siya’y nahimong kung unsa na lang siya sa karon. Kita n’yo?

204 Si David, ang hari kaniadto nga nagrepresentar kang Cristo! Timan-i ninyo kana. Nagrepresentar si David kang Cristo. Nagatoo ba mo niana? Si Cristo nga magalingkod . . . magalingkod sa trono ni David. Ug kining si David, usa ka tawong tukma sa kasingkasing Mismo sa Dios, aduna kaniadto og lima ka gatus ka mga asawa. Nasabtan n’yo ba ang buut kong ipasabot? Si David nga adunay lima ka gatus niyang mga asawa, si Solomon usab nga adunay iyang usa ka libo. Ug si Solomon mao ang anak ni David, sa natural; nga nagrepresentar kang Jesus Cristo, nga Anak ni David, diha sa espirituwal. Apan sa natural man kana, ang kinabuhi nga may pagpakighilawas. Kini sa laing bahin mao ang mamahimong espirituwal, mga gilalang, oo, mga gilalang. Kita n’yo? Ingon niana kini sa sinugdanan kaniadto, apan dili na karon sa niining kinabuhi nga atong gikinabuhi karon.

205 Matikdi, ayaw n’yo kini pakyasa karon, toohi n’yo ang tibuok niini sa inyong mga kasingkasing. Apan wala gayu’y ni usa niadtong mga babaye ang puedeng magbaton og sobra sa usa ka bana. Ang lalaki man ang orihinal nga linalang, dili ang babaye. Wala ni usa niadtong mga babaye ang puedeng magbaton og usa pa ka bana, apan kadtong usa ka bana puede ra nga magbaton og

usa ka libo ka mga asawa. Kana'y MAO KINI ANG GINAINGON SA GINOO. Mao kana ang Biblia. Bueno akong gibalikan, nga wala nagdali ug gipakita ko kaninyo kon diin kini nagsugod kaniadto, ang gisulti ni Jesus. Karon nakita na ba ninyo kini sa ingon ka klaro? Puede ra silang magbaton og ingon ka daghang. . .

<sup>206</sup> “Oh,” moingon mo, “para lang kadto sa Israel.” Mao ba?

<sup>207</sup> Kaniadtong gidala ni Abraham si Sarah didto sa nasud sa mga Filistihanon, dunay usa ka hari didto nga ginganlan og Abimelech. Ug usa ka gatus na ang panuigon ni Sarah kaniadto, mismo, apan giusab man siya'g balik sa pagkabatan-ong babaye ug nahimong maanyag. Nasayod ba mo niana? [Nagaingon ang kongregasyon, “Amen.”—Ed.] Okey. Ug gitinguha ni Abimelech nga pangasaw-on siya. Mahinumduman n'yo ba ang akong Mensahe mahitungod niini? Gitinguha ni Abimelech nga pangasaw-on si Sarah. Tingali'g aduna na siya'y mga ginapuyo-puyo kaniadto, apan dili man niya puedeng pangasaw-on si Sarah kung kasal na kini kang Abraham. Busa giingnan ni Abraham si Sarah, “Ingna lang nga ikaw, ‘siya’y akong igsoon,’ tungod kay patyon man ko niya aron ikaw iyang maangkon.” Nganong wala na lang niya gipapahawa si Abraham didto sa maong nasud, ug gikuha ang asawa niini ug mapadayon na niya? Dili lang kini balaod para sa mga magtotoo, kondili para sa tanang mga tawo sa kabuhatan. Makasasala man o usa ka balaan, aduna gyud ka'y tulubagon, nga lalaki, tungod niini nga mga buhat. Adunay usa ka pagano nga hari kaniadto. Pila man ang nasayod nga tinuod kana nga estorya? [“Amen.”] Anaa kini sa Biblia, sa Genesis, mga ika-16 nga kapitulo, siguro.

<sup>208</sup> Matikdi ninyo, napangasawa na gyud unta siya ni Abimelech kaniadto. Giandam na niya ang iyang kaugalingon aron minyoan kining gibag-o na nga Hebreohanong babaye. Ug miingon siya, “Ako kining. . .” Miingon si Sarah, “Ako kanang igsoong lalaki.”

Miingon pud si Abraham, “Ako kanang igsoong babaye.”

<sup>209</sup> Ug miingon si Abimelech, “Pangasaw-on ko na lang siya kung ingon niana.” Mahunahuna n'yo ba ang usa lalaki nga mobuhat og ingon niadtong butang? Apan gibuhat niya kadto.

<sup>210</sup> Ug dayon niadtong gabhiona, samtang nahikatulog siya, nagpakita ang Ginoo kaniya diha sa usa ka damgo, ug miingon, “Abimelech, mahimo ka nang isipon nga usa ka patay nga tawo.” Gitipigan sa Dios kadto, kadtong kaliwat sa dugong Judio kaniadto, nakita n'yo. Miingon ang Dios, “mahimo ka nang isipon nga usa ka patay nga tawo. Gikuha mo ang asawa sa ubang lalaki nga gikatakda mong pakaslan.”

<sup>211</sup> Miingon siya, “Ginoo, nasayod Ka man sa pagkamatinuuron sa akong kasingkasing.” Miingon, “Dili ba miingon man siya kanako nga iya kadtong ‘igsoong lalaki’? Dili ba siya mismo miingon man usab nga, ‘Siya akong igsoon nga babaye?’”



212 Miingon ang Dios, “Nasayod Ako sa pagkamatinuuron sa imong kasingkasing, mao kana ang hinungdan nga dili Ko ikaw tugotan nga makasala batok Kanako.” Husto ba kana? Miingon, “Tuli ang iyang asawa, tungod kay ang maong lalaki Ako mang propeta. Ug gawas kon ibalik mo kaniya ang iyang asawa. . . Ug magpa-ampo ka kaniya, dili sa imong pari. Kung dili siya mag-ampo alang kanimo, nan malaglag gyud ang tibuok mong nasud.” Amen. Makahibulongang grasya kadto. Oo. “Malaglag gyud ang tibuok mong nasud. Asawa kana niadto nga lalaki, ug siya’y Akong propeta.” Amen. Kadto’y MAO KINI ANG GINAINGON SA GINOO. Mao kana ang Kasulatan. Oo.

213 Karon hingsayran nato, nga kamatayon ang resulta niadto. Kamatayon ang resulta tungod sa kasal-anan sa babaye, tungod sa babaye ug dili nga tungod sa lalaki. Tungod sa iyang pamaagi sa pagkinabuhi, ug tungod kaniya, miabot ang tanang kamatayon. Ang pamaagi nga siya nagakahimugso mao’y kamatayon. Pila man ang nahibalo niana? Job 14, kung gusto n’yong isulat ang maong Kasulatan.

214 Aduna ako, kung magduhaduha man mo niini, aduna man ko’y gisulat nga mga Kasultan para sa matag punto niini.

215 Kung gusto n’yong basahon ang Job 14 dinha, nagaingon Kini, “Ang tawo nga natawo sa babaye hamubo ra sa panuigon, ug tugob sa kasamok.” Husto ba kana? “Siya manglimbukad sama sa bulak, pagaputlon siya, ug nagakalaya,” ug uban pa. Kita n’yo? Ang matag tawo nga natawo sa usa ka babaye, natawo sa kamatayon sa dihadiha nga mahimugso siya.

216 Apan pag natawo siya diha sa paglalang sa Dios, dili siya mahimong mamatay; siya’y gikan man niadtong usa pa ka Kahoy nga atua sa tanaman sa Eden, si Cristo. Kinabuhing Walay Katapusan ang nagagikan sa maong Kahoy.

217 “Oh,” moingon mo, “usa diay siya ka punoan?” Oo. “Bueno, ingon nila, ‘Dili kamo magkaon gikan niini nga punoan.’ Miingon ang Dios, sa Genesis kaniadto, ‘Dili kamo magkaon gikan niini nga punoan.’”

218 Bueno, ang babaye mao ang punoan. Siya ang punoan nga nagapamunga. Kamo mao ang bunga sa inyong inahan. Kamo mao ang bunga sa tagoangkan. Husto kana. Ug busa ang bunga sa Kahoy sa Kinabuhi, nga atua kaniadto sa tanaman sa Eden, mao si Cristo. Tungod sa babaye miabot ang kamatayon; pinaagi pud sa maong Lalaki, sa orihinal nga paglalang, miabot ang Kinabuhi. Ang matawo diha sa usa ka babaye mao’y kamatayon; ang matawo diha kang Cristo mao’y Kinabuhi. Nasabtan n’yo ba ang ideya? Mao kana. Karon nakita na ba ninyo kon diin mipaingon ang mga diosa-diosa, dili ba?

219 Ang unang Adan ug Eva nagatipo sa ikaduhang Adan ug Eva, kita n’yo, ang pagpadaghan. Bueno ang pagpadaghan ni Adan ug ni Eva kaniadto mao’y pinaagi sa pagpakighilawas,

aron pun-on ang kalibutan, apan dili man ingon niana sa sinugdanan. Naghimo ang Dios og usa lang ka lalaki ug usa ra pud ka babaye, sama sa paglalang Niya sa uban pa Niyang mga linalang, kita n'yo, nga legal, sama lang sa Iglesia.

<sup>220</sup> Karon atong, sa pagpalandung niining mga gipanghimatud-an nga mga Kamatuoran sa Dios, susihon pa'g diyutay, kung gusto ninyo. [Nagaingon ang kongregasyon, "Amen."—Ed.] Sige. Karon mahimong makapasakit kini og diyutay hangtud nga modangat kita sa kinahiladman niini, apan ipakita ko lang kaninyo ang Kamatuoran niini.

<sup>221</sup> Walay ministro ang mahimong mangasawa og usa ka balo. Nasayod ba mo niana? Gusto n'yo bang basahon kana? Okey, ablihi ninyo sa mga Levitico, Levitico 21:7 ug Ezekiel 44:22, ug ipakita Niini kaninyo nga ang mga sacerdote dili angay'ng mangasawa og usa ka babayeng nahilabtan na og lalaki. Nagatipo kini sa ulay nga Pangasaw-onon ni Jesus Cristo, tungod kay sila man ang nagahawid sa Kalayo sa Dios, ang mga sacerdote, ang mga anak ni Aaron kaniadto. Wala na kita'y oras aron basahon Kining tanan, ug manggawas na man gud ta pagka-udto, aduna na lang kita'y baynte minutos. Ug sila ang mga anak ni Aaron kaniadto nga naghawid sa—sa—sa Kalayo sa Dios, mao nga dili sila puedeng mangasawa og usa ka babaye nga nahilabtan na sa ubang lalaki. Mao kana'y giingon sa walay-pagkausab nga Dios. Dili gayud sila puedeng mangasawa og usa pa ka babaye, ug usa ka babayeng nahilabtan na sa usa ka lalaki, nga ginapakita dinhi ingon nga tipo, kung gusto n'yong masabtan kini, nga ang Iglesia sa buhi nga Dios putli gayud, og walay-sambog, ang Pulong sa Dios, ug dili usa ka denominasyon nga nahilabtan na sa tawo.

<sup>222</sup> Matikdi, atong basahon kini dinhi. Gusto ko nga maipasabot kini kaninyo. Sa Mateo 5, naghigot dinhi si Jesus mahitungod sa usa ka butang nga mahinungdanon gayud kaayo. Gusto natong hibaloon kini, sa Mateo 5. Gisulat nako sa akong . . .

<sup>223</sup> Gimarkahan ko ang pipila ka mga butang nga igasulti ko para lang sa lalaki, og medyo malisud lang nga isulti kini sa atubangan sa atong mga igsoong babaye. Apan gusto ko nga—nga modangat na dinhi karon sa dili pa . . .

<sup>224</sup> Karon, igsoong babaye, gusto kong ipahimutang kamo sa dapit nga gikasaad sa Pulong sa Dios para kaninyo, ug siguradoha ninyo nga magpabilin gyud kamo diha niana nga dapit, usab.

<sup>225</sup> Mateo 5:32. Gusto ko nga matikdan ninyo dinhi, aron mapamatud-an kining mao ra nga ideya mahitungod sa "usa ra" ug "dinaghan." Mateo, traynta- . . . siguro sa Mateo 5:32 kini, magsugod sa 31.

*Giingon man usab, Bisan kinsa ang magabiya sa iyang asawa, kinahanglan iyang hatagan siya og usa ka sulat-pamatuod sa panagbulag:*

226 Si Jesus kana nga nagasulti, ang Mao’y nagsulti, “sukad pa sa sinugdan.” Karon matikdi.

*Apan ako nagaingon kaninyo, Nga bisan kinsa nga magabiya sa iyang asawa, gawas kon . . . ang hinungdan mao ang mga pakighilawas, nga nagahimo kaniya nga mananapaw; . . . (kita n’yo) bisan kinsa nga magabiya sa iyang asawa, gawas kon . . . ang hinungdan mao ang pakighilawas, nga nagahimo kaniya nga mananapaw: (Ngano man? Tungod magminyo man ang babaye pag-usab.) ug ang mangasawa sa usa ka babayeng binulagan nakapanapaw na.*

227 Kita n’yo, aduna siya’y usa ka bana nga buhi pa, busa walay lalaki nga puedeng makigminyo kaniya. Dili ko igsapayan kung unsa ma’y ginabuhat niya ug kung kinsa man siya, aduna siya’y usa ka bana nga buhi pa, wala gayud siya’y angay’ng ika-rason man lang. Apan, dili kini, para sa lalaki. “Nagahimo sa babaye,” dili sa lalaki. Nasabtan n’yo ba kini? Kinahanglan mong mapatakdo ang Pulong. Kita n’yo, walay unsa man nga gikasulti nga dili puede ang lalaki, apan ang babaye ang dili puede. Kita n’yo, “nagahimo sa babaye,” dili sa lalaki. Eksaktong ingon niana ang ginaingon sa Biblia, “nagahimo sa babaye.” Wala gikasulti nga batok sa lalaki ang magminyo pag-usab, kondili sa “babaye.” Ngano man? Si Cristo man ang maong tipo.

228 Himatikdi, gikasulti nga dili puedeng magminyo pag-usab ang lalaki, gawas kon sa usa ka ulay. Puede man siyang magminyo pag-usab. Puede siyang ma- . . . puede siyang magminyo pag-usab kung usa kini ka ulay, apan dili siya puedeng makigminyo sa asawa sa uban. Dili gayud. Ug kung makigminyo man siya sa usa ka diborsyadong babaye, nan magkinabuhi ang maong lalaki diha sa pagpanapaw, dili ko igsapayan kung si kinsa pa siya. Miingon ang Biblia, “Ang si kinsa man nga mangasawa sa babayeng biniyaan, nagakinabuhi sa pagpanapaw.” Mao kana, dili puede ang mga diborsyadong babaye.

229 Nakita na ba ninyo ang orihinal kaniadtong, “sukad pa sa sinugdan,” ha? Ang pagminyo pag-usab, karon matikdi, puede ang lalaki, apan dili puede ang babaye. Sama ni David, sama ni Solomon, sama sa pagkatakdo sa tibuok Biblia, kaniadto, sama kang David ug sa tanang uban pa kanila.

230 Karon matikdi ninyo sa Unang Mga Taga-Corinto 7:10, matikdi, nagatugon si Pablo sa asawa nga, nga makigbulag sa iyang bana, nga magpabiling mag-inusara o kinahanglan nga magpakig-uli, og dili magminyo pag-usab. Kinahanglan niyang

magpabilin nga mag-inusara, o kaha makig-uli sa iyang bana. Dili siya puedeng magminyo pag-usab. Kinahanglan niyang magpabilin nga mag-inusara, apan, matikdi, walay gisulti si Pablo mahitungod sa lalaki. Kita n'yo, dili mo mahimong mapabakak ang Pulong. "Sukad pa sa sinugdan," ang balaod sa pakighilawas pinaagi sa pagpangasawa og daghan. Karon, nagakatakdo nga tinuod ang Pulong sa Dios diha sa kinaiyahan sa Dios, nagakatakdo gayud.

<sup>231</sup> Kita n'yo na kung giunsa nga dunay usa ka opinyon nga mipaingon sa sidlakan, ug ang laing usa nga mipaingon sa kasadpan, mahitungod niini? Kinahanglan mo gayud nga mobalik sa Kamatuoran, aron mahibaloan kung unsa kini.

<sup>232</sup> Ingon na niana kini sa una pa, mao kana ang regular nga pakigsaad sa Dios sukad pa sa sinugdan. *Una*, sa wala pa ang sinugdanan, sukad pa sa sinugdanan aduna lama'y usa ug usa. *Human* nga nakasulod ang sala, nan aduna na'y usa ka lalaki ug daghang mga kababayen-an; ingon na niana usab sa kinaiyahan, sa matag hayop, ug sa mga tawo ug sa natural nga unod nga mao ang hayop. Mga mammal kita, nasayod kita niana, kitang tanan, kita n'yo, ug kining tanan kinaiyahan sa Dios nga anaa sa kahan-ayan.

<sup>233</sup> Apan karon nga naablihan na ang mga Selyo, ang Espiritu na sa Kamatuoran ang nagagiya kanato paingon sa Pulong. Mao kana kon nganong dunay mga sayup nga nahitabo sa tanang nangagi nga mga kapanahonan, tungod kay wala pa man naablihan kaniadto ang mga Selyo, og wala pa Kini nahipadayag. Tinuod kana.

<sup>234</sup> Himatikdi, kamo, dili n'yo mapahimong sayup ang mga landong. Maingon sa akong giwali kagabii mahitungod sa landong nga anaa sa salog, siguradong mogimaw gyud kana nga husto. Unsaon man pagkaaduna og landong sa elepante diha sa salog, ug usa ka gamay'ng, niwang nga lalaki diay ang mogimaw ingon nga mao ang elepante, o kaha ang elepante ang mao'y mahimong usa ka gamay'ng, niwang nga lalaki?

<sup>235</sup> Karon kung matikdan ninyo kini sa hingpit nga pagtipo.

<sup>236</sup> Bueno, adunay usa ka tinuod nga babaye, usa ka tinuod nga babayeng, ulay, nga nakigminyo sa iyang bana, ug nagakinabuhi, ug usa siya ka panalangin para sa maong bana. Kung makahatag pa ang Dios sa Iyang anak og mas maayong butang kay sa usa ka asawa, nan tingali'g gihatag na Niya kana para sa maong anak.

<sup>237</sup> Apan gidisenyo man ang tawong babaye para sa pakighilawas, ug wala na'y uban pang mananap ang gidisenyo nga ingon niana. Wala na'y uban pang linalang sa yuta ang gidisenyo nga ingon niana. Mao kana'y hinungdan nga makakita kamo og mga nagapangawasa og daghan, tungod niana. Mao kana ang nagpahinungdan niana.

238 Karon matikdi, sa katapusan nga pagsusi, matikdi, adunay usa ra ka Jesus Cristo (husto ba kana?), usa ra ka Tawo, nga Dios, si Emmanuel. Nagatoo ba mo niana? Apan daghan ang mga miyembro sa Iyang Asawa, kita n'yo, linibo ka pilo nga linibo (husto ba kana?), ang Iyang Asawa, ang Pangasaw-onon, ang Iglesia. Nasabtan na ba ninyo karon?

239 Mao kana kon nganong gisultihan Niya si Adan kaniadto, sa wala pa nasugdan o gipresentar ang pakighilawas, “Magpadaghan, aron mapuno ang yuta,” sa kaniadtong anaa pa siya sa sinugdanan, kaniadtong pareho pa siya nga lalaki ug babaye sa iyang kaugalingon mismo. Kana, nagapakita lang kung ingon niana nga ang Pangasaw-onon kinahanglan nga magagikan sa Pulong, pinaagi sa espirituwal nga pagpadaghan, mga pagpadaghan, kita n'yo, nga nagapapuno sa yuta.

240 Karon sa pakighilawas, kita n'yo, tungod sa mga opinyon gikalibogan hinoon ang maong duha ka butang. Busa dili mo mahimo kana, kinahanglan mong balikan ang Kamatuoran niini, “sa sinugdanan.”

241 Ug sa katapusan magkaadunay usa ra ka Ginoong Jesus, ug daghan ang Iyang Pangasaw-onon, ingon nga usa ra. Nasabtan n'yo ba kini? Adunay usa ra ka David sa usa ra ka trono, usa ra ka hari (nga tukma sa kasingkasing Mismo sa Dios) nga adunay lima ka gatus ka mga asawa. Si Jesus pud nga magalingkod sa Iyang Trono (Alleluyah!) sa Milenyum, nga adunay usa ka Asawa; nga sama kaniadto sa sinugdan, pagalalanganon gikan sa yuta, pinaagi sa kamot sa Dios nga Makagagahum-sa-tanan, diha sa pagkabanhaw, nga maglangkob na sa daghang mga miyembro. Ingon niana.

242 Mga babaye, pakigbisog mo nga mamahimong ingon niana, dumuol mo kang Cristo, aron nga dili kamo mapahimutang nianang mahugaw nga kahimtang dinha. Apan samtang miyembro lang kamo sa usa ka iglesia nga gapaningkamot nga magkinabuhing matarung ug buutan, sa inyong kaugalingon, nan dili gyud ninyo mahimo kana. Dili usab kana mahimo sa usa ka lalaki nga anaa gawas kang Cristo. Sumala sa gikasulti ni Pablo, “Apan tanha sa mga, anaa kang Cristo, walay lalaki ni babaye.” Silang tanan usa ra.

243 Apan para maiklaro kining *Kaminyoon Ug Panagbulag*, aron masayran ninyo kung unsa ang husto ug kung unsa ang sayup, karon ginapakita Niya sa ingon ka klaro dinhi niini nga mga tipo. Adunay usa ra ka Cristo, ug daghan ang mga miyembro niana nga Asawa. Matikdi, mahimo man Niya kitang bulagan tungod sa espirtual nga mga pagpanapaw ug mini nga doktrina, sa bisan unsang orasa nga gustohon Niya; apan daw sa unsa ka mapangahason ninyo nga bulagan Siya, ug maluwas gihapon? Mahimong biyaan sa lalaki ang iyang asawa ug magminyo og lain; apan dili puedeng biyaan sa babaye ang iyang bana ug

magminyo og lain. Nakita ba ninyo ang tanang mga landong ug mga tipo diha sa bug-os nga pagkabalanse? Kita n'yo na ang orihinal nga linalang; dili ang binuhat nga gikan lang sa orihinal bisan unsaon. Dili ang iglesia; kondili ang Pangasaw-onon pinaagi sa Pulong. Dili ang babaye; kondili ang lalaki, sa matag higayon. Mao kana kon nganong walay unsa man nga gikasulti batok sa lalaki nga maoy nagbuhat niana; kanunay'ng ang babaye gyud. Eksakto gayud kana.

<sup>244</sup> Apan puede man ang babaye mamahimong Pangasaw-onon ni Cristo, pinaagi sa pagka. . . Ug hinumdumi, siya ingon nga kabahin sa lalaki, miingon ang Biblia nga siya'y mamahimo la- . . . "Bisan pa man dili ako motugot nga ang babaye magpanudlo, o magkaaduna og unsa man nga kagahum, kondili magpakahilum lamang. Kay si Adan man ang una nga gibuhat, ug dayon si Eva. Ug dili si Adan ang nalimbongan, kondili ang binuhat lang gikan sa orihinal mao ang nalimbongan. Apan ang babaye mamaluwas *kon* siya magapadayon sa pagkabalaan ug kaligdong, ug pinaagi sa iyang pagpanganak, ug tanan nang ingon niana," kay tungod niana mamahimo na man siyang kabahin sa maong lalaki. Mao kana ang nagpahinungdan. . .

<sup>245</sup> Nganong si Abraham wala man. . . Nganong wala man gipatay sa Dios si Sarah kaniadto nga nagalingkod mismo didto, nga nagalimod, ug nagapamakak mismo sa atubangan sa Dios? Ang Dios nga nagalingkod didto ingon nga usa ka mortal nga Tawo, nga nagakaon og karne, nagakaon og tinapay, nagainom og gatas, ug ingon Niya, "Nganong mikatawa man si Sarah dinha sa luyo," sa luyo Niya, didto sulod sa balongbalong, nga wala pa gyud Niya makita sukad-sukad, "nga ginasulti ang ingon niini, "Unsaon man pagkahitabo nianang mga butanga?"

<sup>246</sup> Ingon si Sarah, "Wala gyud ko nagsulti og ingon-ana!" Oh, ooh, aba! Giingnan niya ang Dios nga bakakon Siya, sa Iyang atubangan mismo? Apan dili man Niya mahimong patyon si Sarah. Ngano man? Kabahin man siya ni Abraham. Amen. Dili Niya mahimong pasakitan si Sarah nga dili masakitan si Abraham.

<sup>247</sup> Karon kamong mga babaye tan-awa n'yo kon asa mo nakapuwesto. Ug miingon ang Biblia, "Kamong mga babaye magmahisama kamo ni Sarah kaniadto, nga gidayandayanan ang iyang kaugalingon sa pagpangbisti nga maugdang, nagkinabuhi nga matinuuron ug tinuod sa kaugalingon niyang bana, nga gihigugma si Abraham og ayo nga siya. . . gitawag niya siya nga iyang 'ginoo,'" tigpangulo, nga may panag-iya kaniya.

<sup>248</sup> Ug kamo, ang pipila sa mga kababayen-an, nga nagasul-ob niining mahilas nga mga bisti ug mogawas dinhi aron ipasundayag ang inyong kaugalingon atubangan sa lalaki. Miingon si Jesus, "Ang si kinsa man nga nagatan-aw sa babaye

nga may pagkaibog kaniya nakapanapaw na uban kaniya sa iyang kasingkasing.” Kung ingon-ana si kinsa man ang sad-an, ang lalaki ba o kamo? Usa siya ka lalaki, gihimo aron mahimo ang ingon niana nga buhat, kita n’yo; ug kamo man ang babaye, nga angay unta nga magdumili.

<sup>249</sup> Ug nganong ginapasundayag man ninyo ang inyong kaugalingon nga ingon niana? Dili nga para mabugnawan, kabalo mo nga dili man ingon niana ang rason, kay halos mamatay na gani mo sa katugnaw nga sul-ob kanang mga purol. Kita n’yo, dili nga para mabugnawan. Kung ingon-ana para sa unsa man diay? Para sa kalaw-ayan! Dili mo moangkon niana, apan mao kana’y ginaingon sa Biblia. Kamatuoran kini. Usa kana ka espiritu sa kalaw-ayan ang anaa kaninyo. Dili man ninyo gusto nga mahimong malaw-ay; apan wala ninyo naamgo, nga sa espirituwal mga malaw-ay kamo, tungod kay ginapasundayag ninyo ang inyong kaugalingon nga malaw-ay.

<sup>250</sup> Bueno, ang usa ka lalaki, sa iyang kunot, mahugaw’ng, bukohon nga mga tuhod, ug kung halos wala man siya’y sul-ob nga sinina, walay diperensya kana, tungod dili man makatintal ang iyang lawas. Ngano man? Siya man ang anaa sa orihinal nga paglalang, kinaiya; gayud, kita n’yo. Apan, kamo mao ang binuhat lang gikan sa orihinal, aron manintal.

<sup>251</sup> Dios, malooy Ka! Oh, grabe, na kining makasasala nga kalibutan! Malipay gayud ako pag matapos na kini.

<sup>252</sup> Matikdi, mahimo Niyang biyaan ang Iyang asawa sa bisan unsang orasa nga gustohon Niya, apan dili puedeng biyaan Siya sa asawa; mahimo Niya ako, mahimo Niya akong ibalik sa abog sa bisan unsang orasa nga mahunahunaan Niya, apan, oh, igsoon, dili gayud ko mosulay nga bulagan Siya, tungod impas gyud ko.

<sup>253</sup> Mahimong mangasawa si Solomon kaniadto sa bisan kinsang babaye nga dili pa minyo, mahimo siyang mangasawa sa bisan kinsang babaye nga gustohon niya. Pero ang usa ka sacerdote mahimo lamang mangasawa sa usa ka babaye nga ulay. Si Solomon . . .

<sup>254</sup> Sama usab ni David, giminyoan niya (unsay ngalan sa maong babaye?) si Abigail. Nga kaniadto, adunay bana nga gibansagan nga “buang-buang,” si Abigael ang buutan niyang asawa, ug namatay siya. Ug naminyo si Abigail kang David; usa man siya ka hari, dili usa ka sacerdote, kita n’yo, busa siya—nakigminyo siya.

<sup>255</sup> Apan dili kadto puedeng buhaton sa usa ka sacerdote, tungod kay mahilabtan niya o mapangasawa niya ang usa ka babaye nga nahimo nang asawa sa ubang lalaki. Busa ginapakita lang niana ang pagkaputli sa Iglesia ni Ginoong Jesus Cristo, ang Pangasaw-onon kinahanglan nga mamahimong walay-sambog, ang Pulong, wala ni usa ka Pulong man lang ang mawala.

Sigurado gayud. Mahunahuna n'yo ba ang usa ka tarung nga pangasaw-onon, nga nawala ang usa ka suso, ug, ang usa pa, aduna pu'y diperensya, kabalo na mo? Dili ingon niana ang mamahimong Pangasaw-onon ni Cristo. Siya'y hingpit. Siya mao ang tanang Pulong, nga wala ni usa ka Pulong ang nawala sa bisan asang bahin. Wala.

<sup>256</sup> Matikdi, puede Niyang biyaan ang babaye, apan dili puedeng biyaan Siya sa babaye. Gibuhat na Niya kini, og napamatud-an na kini, sa mga adlaw kaniadto nga si Luther, si Wesley, ug ang Pentecostal, kaniadtong nagdumili sila nga mamahimong mas kabahin pa Niya pinaagi sa pagkaaduna og espirituwal nga pagpakighilawas aron maburos sila pinaagi sa dugang pa nga bahin sa Pulong. Nasabtan ba ninyo? Nagdumili ang babaye. Nagdumili ang iglesiang Lutheran nga magkaaduna pa og tinguha si Cristo diha kaniya; nagdumili niini si Luther. Ug isulti ko kini, bansagan n'yo ra man ko gihapon og bisan unsa; ingon niana sa gihapon sa karong panahon diha sa matag usa kanila, nangapakyas silang dawaton ang Pulong, og gisalikway nila si Cristo!

<sup>257</sup> Ug ang si kinsa mang babaye nga magdumili nga maburos sa iyang bana, walay katungod nga mamahimong asawa niya. Amen. Mahinumduman ba ninyo, diha sa Biblia, kaniadtong gipangasawa sa hari si Ester? Tungod kay nagdumili man ang unang rayna kaniadto, nangasawa na lang siya og lain. Ug sa diha nga ang . . . Unsa ma'y nahitabo kaniadtong nagdumili ang rayna nga magpakita sa hari ug motuman kaniya? Mao gihapon sa usa ka babaye nga nagadumili nga mahimong asawa sa iyang bana.

<sup>258</sup> Ug mao man gihapon sa iglesa nga nagadumili nga maburos sa kapanahonan nga atong gikinabuhian karon, aron maghimugso unta og mga anak sa niini nga kapanahonan. Dili kita mga Lutheran, dili kita mga iya ni Wesley, dili usab kita mga Pentecostal! Kinahanglan nato nga mamahimong mga anak sa niini nga kapanahonan, pinaagi sa pagsamkon sa Pulong sa Dios, aron mahimugso ang usa ka Anak sa niini nga kapanahonan, ang Binhing Anak. Amen. Nagalaum ko nga nakasabot mo. Nagdumili nga maburos, nagdumili, busa unsa ma'y gibuhat Niya? Gibiyaan kini, og nakigbulag. Husto kana. Apan dili kini makapangahas nga biyaan Siya. Siya ang mibiya niini.

<sup>259</sup> Nagpadayon Siya mismo sa pagpahayag sa Iyang Pulong ngadto sa Lawas, ug ginapanghimatud-an Siya, gihapon, pinaagi sa Iyang Kaugalingon. Ang Iyang mga anak medyo halos kapareho na Niya, tungod kay bug-os na Kini nga nagakahamtong, o, nahimo na sila nga mga anak sa Pulong, dili nga mga anak sa iglesia. Mga anak gayud sa Pulong! Ug ang Pangasaw-onon mamahimong usa ka hiligugmaon nga Babayeng maugdang sa Pulong, putli, nga wala nahilabtan sa bisan unsa man nga organisasyon sa tawo, og unsa mang



hinimo'g-tawo nga teorya. Siya'y mamahimong putli gayud, og walay-sambog, nga Pangasaw-onon sa Pulong! Amen ug amen! Nagalaum ko nga nasabtan ninyo kana, dinha sa mga anaa sa pagsibya. Siya mao ang mamahimong mabdos nga anak nga babaye sa Dios.

<sup>260</sup> Kita n'yo na kung unsa ka dakung kadungganang ang usa ka babaye? Kita n'yo na kung unsa ka halangdong butang ang iglesia, apan nakita n'yo ba kung asa siya gidala sa kalaw-ayan? Dayon ginasulayan pa ninyong itandi kanang iglesia dinha sa Iglesia dinhi, dili kana mamahimo. Ug sulayan pa ninyong itandi ang bigaon sa dalan diha sa Iglesia sa buhi nga Dios; o kaha ang babaye, ang hustong babaye, diha sa usa ka bigaon?

<sup>261</sup> Nganong aduna ma'y mga ingon nianang butang? Tungod balaod man kana sa Dios, ang balaod sa pagkalahi. Unsaon man nato pagkahibalo nga pasalamatang ang kasanag sa adlaw kung walay gabii? Unsaon man nato pagkahibalo nga pasalamatang ang uga nga panahon kung walay ulan? Unsaon man nato pagkahibalo nga hataga'g bili ug tahuron ang usa ka maugdang nga babaye, kung walay usa nga malaw-ay?

<sup>262</sup> Siya nagpadayon mismo sa pagpahayag Niini, sa pagpahayag sa Iyang Pulong, apan mapangahason gayud ang si kinsa man kanato nga mosulay sa pagbiya Kaniya ug magminyo og lain.

<sup>263</sup> Karon siguradong klaro na gyud kon nganong sayup ang maong duha ka teorya. Dili mo mahimong mapatakdo kini nga *ingon-niini*, mawala kini; kon itakdo pud nimo kini nga *ingon-niana*, nan diretso kining molagpas sa saad. *Ania* ang saad, ania ang maong butang dinhi mismo. Dili man nagakasumpaki ang Pulong. Kinahanglan Niining magpabilin nga anaa sa pagkatakdo, maingon man usab nga dili nagakasumpaki ang Mateo 28:19 sa Mga Buhat 2:38.

<sup>264</sup> Bueno, ang pipila kaninyo nga mga kababayen-an, ang pipila kaninyo nga mga kalalaken-an, ako—nasayod ko nga kamo'y—wala kamo miuyon Niini. Tungod, kabalo na mo, dili man ninyo maililong kana karon mismo. Dili gayud.

<sup>265</sup> Apan ipakita ko lang kaninyo ang usa ka butang. Kung miingon ang Mateo 28:19, “Busa panglakaw kamo, tudlo-i ang tanang kanasuran, og bautismohan sila sa Ngalan sa Amahan, ug sa Anak, ug sa Espiritu Santo,” ug wala ba diay nila kana gisunod, tungod ang matag tawo nga nabautismohan kaniadto nabautismohan man nga dili ingon niana, kondili nabautismohan sa Ngalan ni Jesus Cristo, bisan sa tibuk kapanahonan sa Biblia ug sulod sa tulo ka gatus ka tuig human sa kapanahonan sa Biblia, hangtud sa Konseho sa Niceaea. Nanagdawat man gud ang mga tawo og mga dogma human niadto. Unsa na lang kaha, kung wala kini nahipadayag?

266 Ug nasayod ba mo nga ang tibuok Basahon, ang tibuok Biblia, mao'y usa ka kapadayagan? Sa ingon-anang paagi ninyo angay'ng mahibaloan ang kamatuoran tali niining usa ug sa uban pa, tungod kay usa man Kini ka kapadayagan. Ug ang kapadayagan kinahanglan nga tukma gayud sa Pulong, dili nga sukwahi sa Pulong. Moingon mo, "Bueno, ako, napadayag pud kini kanako." Dayon kung sukwahi kana sa Pulong, nan dili gyud kana gikan sa Dios. Husto kana.

267 Karon kung gusto n'yong basahon ang Mat...Mateo 16:18. Miingon si Jesus, Mismo, nga ang tibuok Iglesia, ang Iyang Iglesia, pagatukoron diha sa espirituhanong kapadayagan mahitungod sa Iyang Kaugalingon, nga mao ang Pulong. "Sultihan Ko ikaw, nga ikaw mao si Pedro...Ug wala kini gipadayag kanimo sa unod ug sa dugo, kondili ang Akong Amahan nga anaa sa Langit mao ang nagpadayag niini kanimo. Ug ibabaw niining bato..."

268 Karon, nasayod ko, nga ang atong mga higalang Katoliko dinha, ginaingon ninyo, "Gitukod Kini kang Pedro, ug si Pedro nga apostoles, busa, *Ingon niini-ug-ingon niana*, sa apostolikanhong pagtugot, og pagpuli-puli."

Miingon pud ang mga Protestante, "Gitukod Kini kang Jesus Cristo."

269 Dili aron nga mahimong lahi, apan toohi lang ninyo kung unsay Iyang gisulti! Miingon Siya, "Wala kini gipadayag kanimo sa unod ug sa dugo, kondili ang Akong Amahan nga anaa sa Langit mao ang nagpadayag niini kanimo. Ug ibabaw niining bato" (ang espirituhanong kapadayagan kung unsa ang Pulong) "Pagatukoron Ko ang Akong Iglesia; ug ang mga ganghaan sa hades dili gayud makagun-ob Niini." Ang Iyang Asawa dili gayud matintal sa ubang lalaki. "Pagatukoron Ko ang Akong Iglesia, ug ang mga ganghaan sa hades dili gayud makagun-ob Niini."

270 Ug si Abel ug si Cain, sa tanaman sa Eden kaniadto. Mihimo si Cain og kaugalingon niyang panghunahuna, ingon niya, "Karon, tan-awa, ang Dios usa ka buutan nga Dios. Anaa Siya sa tibuok kinaiyahan, busa mokuha ako og mga batang ug mga patatas, ug mokuha ako og—og mga bulak, ug himoan ko Siya og usa ka matahum gayud nga altar." Usa kadto ka iglesia. Miluhod siya. Mitoo siya sa Dios. Nagsimba siya sa Dios, gipataas ang iyang mga kamot, og gihalad kini nga halad. Gibuhat pud niya ang tanang pagka-relihiyoso nga gibuhat ni Abel.

271 Nagtukod usab si Abel og mao ra nga matang sa altar. Apan sa dihang gidala na ni Abel ang iyang halad, nagdala siya og usa ka karnero. Bueno, nagdahum si Cain, nga mao na kadto ang mahimong pang-sulbad para sa sala, ingon nga ang iyang amahan ug inahan mikaon man kono og prutas, sumala sa gikatudlo kanila didto sa tanaman. Apan si Abel,

pinaagi sa Balaanong kapadayagan, nasayod siya nga dugo ang nagpahinungdan niadto. Pinaagi sa Balaanong kapadayagan! Ug miingon ang Biblia diha Mga Hebreohanon, sa ika-12 nga kapitulo, ika-11 nga kapitulo, nga, “Si Abel, pinaagi sa pagtoo,” (kapadayagan) “naghalad ngadto sa Dios og usa ka labing maayong halad kay sa kang Cain, nga gipanghimatud-an sa Dios nga siya matarung.” Husto ba kana? Amen! Igsoong lalaki, igsoong babaye, kini’y ingon gayud ka klaro sama sa unsa mang butang, para kanako. Mao kana ang maong tibuok butang.

<sup>272</sup> Karon mahitungod sa *Kaminyoon Ug Panagbulag*, kita n’yo, kinahanglan nga mapadayag kini. Hangtud nga maipadayag kini, dili gyud ninyo masayran kini. Apan nagsaad man Siya nga sa niining kaulahiang mga adlaw, sa niini nga kapanahonan, ang matag gililong nga misteryo mapadayag. Pila man ang nasayod niana? Pinadayag, sa ika-10 nga kapitulo! Gisaad na ni Jesus kini, nga ang tanan niining gililong nga mga misteryo mahitungod sa—sa *Kaminyoon Ug Panagbulag*, ang tanang uban pa niining gililong nga mga misteryo nga sa kaniadto pa, igapadayag sa katapusang panahon. Karon timan-i ninyo, nga miingon ang Tingog, “Adto ka sa Tucson.” Mahinumduman pa ba ninyo ang misteryosong Kahayag sa kawanangan? ang ikapitong Manulonda nga atua didto? kaniadto, ug ang pag-abli sa Pito ka Selyo. Matikdi ninyo kung unsa na ang nahitabo. Tinuod kana.

<sup>273</sup> Bueno sa makadiyut na lang. Apan karon, paminaw kamo! Nasayod ko nga hapit na ang oras para mangaon na kamo, apan nagakaon man ako karon og ayo.

<sup>274</sup> Matikdi, karon, siguradong aduna gyu’y lugar ang babaye, ug usa siya ka mutya. Si Solomon, kining lalaki nga adunay napulo ka libo ka mga asawa...o adunay usa ka libo ka mga asawa, diay, miingon siya nga, “Ang usa ka lalaki nga nakakaplag og usa ka asawa, nakakaplag og usa ka maayong butang.” Miingon siya, “Ang usa ka maayong babaye mao’y mutya sa iyang purong-purong,” kadungganan kana. “Apan ang usa ka dautan mao’y tubig sa iyang dugo,” mao na kana ang iyang kinabuhi. Miingon siya, “Tingali’g adunay usa ka matarung nga lalaki nga makaplagan sa usa ka libo,” gisulti kini ni Solomon, “apan,” miingon, “dili ka makakaplag og usa ka matarung nga babaye sa usa ka libo.” Gisulti kana ni Solomon, kita n’yo. Karon matikdi n’yo kana, ingon niana kini.

<sup>275</sup> Apan, nakita mo, babaye, ikaw mao’y—usa ikaw ka mutya kung gusto mong mamahimo nga mutya, apan ang maong tinguha kinahanglan magagikan gyud kanimu. Ug nakita n’yo na kung nganong ingon niana ang *Kaminyoon Ug Panagbulag*, nga gipahinungod si Jesus kaniadto, tungod kay ang matang man ninyo ang mao’y hinungdan sa tanang sala. Mao kana’y hinungdan nga ang pagpangasawa og daghan ug panagbulag, ug mga ingon niana, nasugdan. Ngani sa sinugdan kaniadto

dili man ingon niana, ug dili gyud mamahimong ingon niana sa kaniadto nga kalibutan.

<sup>276</sup> Matikdi n'yo si Jacob, nga kaniya migawas ang mga patriarca. Aduna siya'y dili mominus sa usa ka dosena nga mga asawa. Giasawa niya ang duha ka mag-igsoong babaye, ug adunay gikapuyo-puyo nga mga asawa gawas niana, mga babaye nga iyang gikapuyo-puyo. Ug kadtong mga patriarca natawo mismo gikan niadtong gikapuyo-puyo nga mga babaye. Husto ba kana? Kita n'yo, mao nga kinahanglan n'yong itakdo ang Pulong sa ingon ka han-ay.

<sup>277</sup> Oh, aduna pa ko'y mga panid mahitungod niini. Kung pangutan-on man ko sa usa ka ministro mahitungod niini, ug magkita kami, mahimo namong hisgotan kini. Apan sigurado, nga kung aduna man siya'y pagka-espirituhanon, nan makita na niya dinhi mismo nga mao kini ang Kamatuoran. Wala na'y pagduhaduha Niini.

<sup>278</sup> Ang usa ka buutan nga babaye maayo man. Nasayod ako niana. Mahibaloan ko kana sa tinuod nga mga babaye. Nakahimamat na ako og tinuod nga mga babaye nga matinuuron, ingon gayud ka matinuuron sama sa kinsa mang lalaki nga nagkinabuhi sukad-sukad.

<sup>279</sup> Siya'y binuhat lang gikan sa orihinal ug usa ra ka bahin sa lalaki, ug sa pagkahulog kaniadto naminaw ang lalaki ngadto kaniya. Siya lang... Kabahin siya sa lalaki. Apan, anaa ra kaniya, gihimo man siya aron mahimo siya nga malaw-ay, ug gihatagan pud siya og katungod sa pagbalibad o sa pagdawat. Sukwahi kana sa orihinal nga kinaiyahan sa sinugdan kaniadto, kita n'yo, apan mao na kana.

<sup>280</sup> Bueno alas dose na gyud, busa laktawan ko na lang ang usa ka butang dinhi alang sa pipla ka gutlo. Aduna ko'y gustong ipangutana kaninyo.

<sup>281</sup> Karon, hinumdumi, nga ginasulti ko kini sa ako lamang pundok. Ug dinha sa mga ana sa pagsibya, ginasulti ko kini sa ako lamang mga sumusunod. Para lang kanila kini nga Mensahe, ug kung unsa ma'y akong ipanulti dinhi.

<sup>282</sup> Ang si kinsa man nga ministro, siya, sa iyaha na kana, oo, siya mao man ang magbalantay sa iyang panon, pasagdi siya nga buhaton ang bisan unsa nga gusto niya. Anaa na kana tali kaniya ug sa Dios. Ang si kinsa man nga pari, ang si kisan man nga magwawali, anaa ra kana kaninyo, igsoon ko.

<sup>283</sup> Nagasulti lang ako dinhi sa Jeffersonville, ang bugtong dapit nga mahimo kong hisgotan kini, tungod kay ako man kining kaugalingong panon. Mao kini ang panon nga gikahatag kanako sa Espiritu Santo aron pagabantayan, ug papanubagon Niya ako tungod niini. Ug kining akong mga tawo mga nakabig kini sila dinhi nga gikan pa sa tibuk nasud, nga akong gidala paingon kang Cristo. Ug, gagmay'ng mga anak, ania ako aron tabangan

kamo, ug inyo akong higala. Mahimong nagahunahuna mo nga nagasulti ako batok kaninyo; pero ginasulti ko kini, kita n'yo, alang sa inyong kaayohan. Gihigugma ko kamo. Ug kung dili man, nan ang Dios mao ang akong Maghuhukom. Kabalo mo nga gihigugma ko gyud kamo.

<sup>284</sup> Usa kini ka malisud gayud nga butang, wala gani ko mahibalo kung unsaon sa pagpahayag niini. Unsa ma'y akong buhaton, sa dihang aduna man ako'y mga kalalaken-an ug mga kababayan-an nga anaa sa akong kongregasyon, ang pipila kanila naminyo na sa makaduha o makatulo ka higayon? Mga buatan nga lalaki ug mga buatan nga babaye, nga nangalibog gayud! Unsa ma'y hinungdan niini? Sayup nga pagpanudlo, eksakto gayud, tungod sa wala paghulat sa Ginoo.

<sup>285</sup> “Ang gihiusa sa Dios, dili pagabulagon sa tawo.” Dili nga ang gihiusa sa tawo; kondili ang gihiusa sa “Dios”! Pag nagkaaduna ka og direkta nga kapadayagan gikan sa Dios, nga kana mao ang imong asawa, ug mao gayud, imoha na gyud siya, sa tibuok mong kinabuhi. Kita n'yo? Apan ang gihiusa sa tawo, mahimo ra nga bulagon ni kinsa man. Pero ang gihiusa sa Dios, walay si kinsa man ang puedeng mangahas nga hilabtan kana. “Ang gihiusa sa Dios,” ang ingon Niya, “dili pagabulagon sa tawo.” Dili ang gihiusa sa kung kinsa mang medyo hubog nga mahistrado o ni kinsa pa man, o usa ka nag-backslide nga magwawali nga ang dala ra'y usa ka hugpong sa mga kredo nga nakasulat sa libro, nga ginatugotan silang buhaton ang bisan unsang butang sa kalibutan, ug samtang ania ra ang Pulong sa Dios. Kita n'yo? Ang ginasulti ko kung unsa ang gihiusa sa Dios.

<sup>286</sup> Karon isulti ko kini kaninyo. Mainampingon kaayo ko kung unsay akong ginasulti kaninyo. Dili ko tuyoy nga mahimong mabagison kaninyo mga igsoon. Wala ko ginatuyo nga mahimong mabagison kaninyo, mga igsoon kong pastor. Wala ko gayud ginatuyo kana. Apan aduna ko'y tulubagon, ingon nga hingsayran ko nga gikatugyan kini sa akong mga kamot, ug kung...dili ko man mahimong pugngan Kini, wala ako mahibalo kung unsaon sa pagpakaylap Niini, ug nasayod ako nga mapakaylap kini sa niining teyp... Oh, aba, mangandam na lang ko, pag abli na ang opisina, tungod kay ania na man kini. Kita n'yo?

<sup>287</sup> Sama ra kaniadto mahitungod sa *Ang Binhi Sa Serpente*, apan bug-os gayud nga napamatud-an kini nga husto. Aduna ko'y mga balita dinhi, nga gikan sa mantalaan, nga ang mga kababayan-an mismo karon...ug bisan sa—sa bantugang... Ang pipila sa mga bantugang mga diocese aduna gani og mga retrato sa orihinal, bahin sa usa ka bitin nga nagakamang diha sa bitiis sa usa ka babaye, ug kung unsa nga nagalikos kini kaniya; aduna siya og tanan na nga matang sa mga sensasyon ug mga ingon-ana, usa ka butang nga dili siya mahimong mahilabtan sa lalaki, tungod nagalikos kining dakung bitin

diha kaniya, ug uban pa. Mao gayud kana ang kamatuoran. Ug nagakasamot kini ug mas nagakasamot, ug mosamot pa gyud. Ang serpente, nga kaniadto dili niya . . .dili na niya mahimong makighilawas sa babaye kaniadtong usa na siya ka serpente, apan hinumdumi . . .

<sup>288</sup> Aduna ako’y debate niadtong miaging adlaw sa usa ka . . .dili ingon nga debate gyud, kondili pagpakig-estorya lang sa usa ka ministro sa Assembly of God ug kaabag niini, nga miingon, “Sayup ka, mahitungod Niana.”

Ingon ko, “Bueno, mahimong sayup ako. Mao nga gusto kong isulti mo kanako.”

<sup>289</sup> Misulti siya pagkahuman, mipadayon ug misugod siya sa paghisgot mahitungod niini. Mahibaloan mo na lang, nawala siya sa iyang argumento. Ug usa ka butang ang gisulti niya, ingon siya, “Igsoong Branham, hain na man kana nga matang? Ingon man ang Dios nga ‘ingon sa iyang matang.’ Karon hain na kana nga matang nga gisulti mo nga tali sa tawo ug sa hayop, nga dili na makaplagan sa siyensiya karon? Hain na man siya?” Ingon pa, “Ania ba siya sa yuta? Usa ba siya ka chimpanzee?”

<sup>290</sup> “Dili, tungod kay ang dugo sa chimpanzee dili man masagol sa tawong babaye, wala na’y uban pang hayop nga mahimong masagol kaniya. Dili, dili gayud, ni ang semilya sa tawong lalaki dili usab masagol sa—sa bayeng hayop. Dili gayud mamahimo.”

<sup>291</sup> “Kung ingon-ana asa na ang maong hayop? Bueno, ang Dios miingon man, “Tugoting magpadaghan ang matag butang ingon sa iyang matang.”

<sup>292</sup> Naghulat ako sa makadiyut. Ug ang kalumo sa Balaang Espiritu miingon, “Sultihi siya, ‘Anaa man siya karon dinhi.’”

Bueno, una miingon ako, “Bueno, tingali’g napuo na kini.”

Ingon siya, “Apan, Igsoong Branham, kana, ang Pulong man ang atong ginahisgotan, dili ba?”

<sup>293</sup> Ingon ko, “Oo, sir.” Ug ingon ko, “Sila, siyempre, nagapamahayag nga ang ubang mga butang kono, sama sa mga dinosaur ug—ug mga higanteng mananap, ug uban pa, sa kaniadto pang mga mananap, o mga higanteng mananap, diay, napuo na ang mga niini, ug uban pa.” Ingon ko, “Tingali’g ingon niana.”

<sup>294</sup> Ingon siya, “Igsoong Branham, ang ginahisgotan man nato mao ang kapanghimatuoran sa Pulong. Kung ania ang sala, nan, ang orihinal nga sala, kinahanglan nga maania kini usab.”

<sup>295</sup> Ug ingon ko, “Ginoong Jesus, miingon man Ka, ‘Dili kamo magkaguol kung unsa ang inyong igasulti sa dihang moatubang na kamo sa tawo, tungod kay igahatag ra kini kaninyo nianang taknaa.’ Ginoo, unsa ma’y akong isulti?” Ingon sa Ginoo, “Sultihi siya, ‘Anaa man kana karon dinhi.’” Sama ra sa pagkakita ko og mga panan-awon sa entablado.

296 Ingon ko, “Anaa man siya karon dinhi,” nga wala nahibalo kung asa gayud.

Ingon siya, “Asa man?”

Ug sa wala pa ako makahunahuna, ingon sa Dios, “Kana mao ang serpente.”

297 Eksaktong mao kini kaniadto, kay dili na man siya usa ka buhing binuhat. Gitunglo na man siya ug magakamang na sa nahibilin niyang mga adlaw. Ania siya. Husto ba kana? Ug hangtud karon nagabuhat siya sa gihapon niadtong iyang gibuhat kaniadto, anaa sa gihapon ang mao ra nga sala nga nagalihok sa usa ka babaye, sama sa pagpakighilawas sa lalaki nga ingon niana. Dinha nagasulirap ang iyang mga mata ug mga ingon niana, pag mabati na niya ang mga sensasyon nga labaw pa kay sa mabati sa kinsa man nga lalaki.

298 Mohunong na ako dinha tungod kay nagkasagol baya ang atong mga tigpaminaw. Dapiton ko na lang ang pipila ka mga kalalaken-an, akong . . . hisgotan pa namo ang mahitungod niini. Aduna ako og daghang mga balita ug mga ingon-ana nga ania mismo dinhi, ania mismo kanako karon, ug ipahayag ko man unta kini nganha kaninyo niining buntaga. Igahin ko unta ang tibuk adlaw bahin niini, apan tapuson ko na sa pagsulti niini.

299 Kini’y para sa akong iglesia lang. Dili nga akong iglesia . . . Ang gamay’ng panon diay nga nagatoo kanako ug nagasunod kanako, para kini kanila.

300 Niadtong miaging adlaw, ingon nga hingsayran ko nga pagmosulti ko kaninyo og unsa mang butang, kinahanglan nga moabot gyud kini nga MAO KINI ANG GINAINGON SA GINOO, busa aduna ako’y mga Kasulatan sumala sa Iyang pagpadayag niini nganhi kanako. Apan, “Ginoong Dios, unsa ma’y mahimo kong isulti para sa kongregasyon? Makapahigayon man gud kini og mga panagbulag. Molvingkod ang lalaki diha sa balkonahe ug dinha sa nataran, ug asa pa man, ‘Biyaan ko ba ang akong asawa?’ Ang mga usab, ‘Biyaan ko ba ang akong bana?’ ‘Unsa ma’y akong buhaton?’” Miingon ko, “Ginoo, unsa ma’y mahimo ko?”

301 Adunay miingon kanako, “Umadto ka sa bukid, ug makigsulti Ko kanimo.”

302 Ug samtang atua ako sa bukid, wala ko kahibalo nga didto diay sa Tucson nakita nila Kini. Mao nga bisan ang mga magtutudlo gipangtawag pa gani ang mga kabataan gikan sa . . . ang akong batang babaye ug sila, pagawas sa ilang klase, ug miingon, “Tan-awa n’yo didto sa maong bukid! Adunay usa ka nagadilaab og nagasiga nga Panganod nga nagapaitaas sa kawanangan ug nagapaubos, nagapaitaas sa kawanangan ug nagapaubos na pud.” Himaya sa Dios.

303 Mrs. Evans, ania ka ba? Ronnie, ania ka ba usab? Sa pag-adto ko didto paingon sa ilang gasolinahan, kining batan-ong lalaki nga atua sa estasyon sa gasolinahan, sa gasolinahan sa mga Evans didto. Ug sa wala pa nako masayri kung unsay isulti sa maong batan-ong lalaki, nakurat ko sa iyaha, ingon siya, “Igsoong Branham, atua ka kaganina sa bukid, dili ba?”

304 Ingon ko, “Unsa ma’y buut ipasabot mo, Ronnie? Wala ko,” kita n’yo, aron lang makita kung unsay iyang buhaton. Sa makadaghan nang higayon nga dunay mga butang nga nagakahitabo, wala ko, dili mo kini ginasulti sa mga tawo. Mahimo kining. . . Ang punto man gud niini nga, sa daghan na kaayong nakita mo nga nagakahitabo, nahimo na lang kini nga ordinaryo para kanimo. Kita n’yo? Dili ko na lang ginasulti sa mga tawo. Ingon ko, “Ronnie, unsa ang imong. . .”

305 Ingon siya, “Mahimo kong ipakita kanimo kung asa ka mismo kaniadto.” Ingon pa, “Gitawag ko gani si mama, ug nagtindog ‘mi dinhi ug gitan-aw kadtong Panganod nga nagalutaw didto, nga nagapaitaas ug nagapaubos. Ingon ko, ‘Siguradong si Igsoong Branham gyud kana nga atua didto sa usa ka dapit. Ang Dios kana nga nagapakigsulti kaniya.’”

306 Ug ang tibuok siyudad, ang mga tawo, nakakita pud Niadto. Diha sa usa ka mahayag nga adlaw nga wala gayu’y mga panganod sa kon asa man, nagalutaw kining dakung nagasiga nga Panganod didto; nagapaubos nga mora’g usa ka imbudo, ug mipaitaas na pud ug mikaylap.

307 Mga higala, ug dayon tapuson ko na, mahimo na kamong magpadayon sukad karon. Mao kadto sa dihang gipadayag Kini kanako, kung unsay igasulti ko kaninyo karon mismo, busa ayaw ninyo paksaya Kini.

308 Karon nagasulti ako para sa amoa lamang mga sumusunod, nga nagasunod kanako ug sa niini nga Mensahe lamang, dili sa mga taga-gawas. Makapamatuod man mo niini sa atubangan sa Dios. Para lang gyud niini nga pundok!

309 Karon nahikaplagan kita sa ingon niining problema tungod sa sayup nga pagpasabot sa teolohiya. Husto ba kana? Mao kana kon ngano nga kamong mga kababayan-an nanagminyo sa ikaduha ka higayon, ug kamong mga kalalaken-an usab, tungod sa sayup nga pagpasabot sa teolohiya. Karon aduna ko’y gustong ipakita kaninyo nga gisulti Niya kanako.

310 Ug kung ang Dios, nga atong Magbubuhath, gipangutana sa maong pangutana kaniadtong ania pa Siya sa yuta, si Jesus Cristo; ug sa dihang miabot na ang Iyang propeta nga maoy magaluwat kanila, si Moises, didto sa Egipto, aron ipahigawas ang mga anak gikan sa—sa Egipto, aron dalhon sila didto sa yutang saad; ug gisulti ni Jesus dinhi nga nakita ni Moises ang mga tawo sa ingon-niini nga kahimtang, ug gihatagan niya sila og sulat-pamatuod sa panagbulag, tungod sa ingon na niadto



nga kahimtang kaniadto. Nakaplagan ni Moises ang ingon niadto, nga, “Itugot kaniya. . .” Gitugotan sa Dios si Moises, ang maong propeta nga gikapadala para sa mga tawo, aron ihatag kining sulat-pamatuod sa panagbulag ngadto kanila.

<sup>311</sup> Ug sa Unang Mga Taga-Corinto, sa—sa ika-7 nga kapitulo, sa ika-12 ug ika-15 nga bersekulo, diha sa Bag-ong Tugon nga propetang, si Pablo, nga nakasinati pud sa mao gihapong butang sa iglesia, ug gisulti kini, “Ako kini, dili ang Ginoo.” Husto ba kana? Tungod kadto sa mga nagahitabo nga mga panagbulag.

<sup>312</sup> “Sukad sa sinugdan dili ingon niana.” Apan gitugotan si Moises bahin niini, ug giila kini sa Dios ingon nga pagkamararung. Ug aduna man usab og katungod si Pablo, sa dihang nakaplagan niya ang iyang iglesia nga anaa sa ingon niadto usab nga kahimtang.

<sup>313</sup> Karon tohi ninyo nga tinuod Kini, ug tohan Kini ingon nga gikan sa Dios! Ug pinaagi sa pagpanghimatuod sa Iyang Panganod ug sa Iyang Mensahe nga naghatud kanako hangtud niini nga punto, dili ba angay usab akong tugotan sa Dios didto sa bukid nga buhaton ang mao gihapong butang, nga tugotan kamo nga ipadayon na lang sa kung unsa na kamo, ug dili na gyud pagabuhaton pa kini! Magpadayon kamo uban sa inyong mga asawa ug magkinabuhi nga malinawon, kay ulahi na ang panahon. Haduol na ang Pag-abot sa Ginoo. Wala na kita’y oras para batbaton pa kining mga butanga. Ayaw na gayud kamo pagpangahas nga buhaton kini pag-usab! Nagasulti ko sa ako lamang kongregasyon. Apan kung minyo ka na. . . Ug gipamatud-an ako sa Dios mahatungod niana, didto sa bukid, nga mahimo kong isulti Kini, nga usa ka supernatural nga kapadayagan, tungod sa pag-abli sa Pito ka Selyo, ug nga usa man kini ka pangutana diha sa Pulong sa Dios. “Tugoti sila nga magpadayon na lang sa kung unsa sila, ug dili na magpakasala pa!”

<sup>314</sup> “Sa sinugdan dili ingon niana.” Husto kana, dili bitaw ingon niana, ug dili gayud mamahimong ingon niana sa katapusan. Apan ilalum sa moderno nga mga kahimtang, ingon nga alagad sa Dios. . .dili ko pagatawgon ang kaugalingon ko ingon nga Iyang propeta; apan nagatoo ko nga tingali, kung wala ako gisugo para niini, nan nagapahimutang lang ako og usa ka pundasyon para kaniya pagmoabot na siya. Busa ilalum sa moderno nga mga kahimtang, ginamandoan ko kamo nga mopauli sa inyong panimalay, nga kauban ang inyong kasamtangang asawa. Kung malipayon ka uban kaniya, nan pagkinabuhi na uban kaniya, padaku-a ninyo ang inyong mga anak diha sa pagpahamatngon sa Dios. Apan kaloy-an unta kamo sa Dios kung buhaton man ninyo kana pag-usab! Matuto-a ninyo ang inyong mga anak nga dili gayud mobuhat sa ingon-anang butang, padaku-a ninyo sila diha sa pagpahamatngon sa Dios. Ug karon nga kamo mao gayud kung

unsa na kamo, managpadayon kita karon, sa ulahi na nga takna sa kagabhion nga atong gikinabuhian, ug “magpadayon kita ngadto sa dauganan sa langitnong pagtawag diha kang Cristo,” kon diin ang tanang butang mamahimo.

<sup>315</sup> Hangtud nga magkita kita unyang gabii, panalanginan kamo sa Ginoong Dios, samtang magampo kita.

<sup>316</sup> Ginoong Dios, ginapasalamatan Ka namo. Ginadayeg Ka namo. Ikaw ang mao gihapon nga gamhanang Jehovah nga nagtugot kang Moises kaniadto. Si Moises, ang maong alagad, ug unsa kaha ang igasulti niya kaniadto sa iyang katawhan? Ug, Dios, gitugotan Mo siya nga maghatag og sulat-pamatuod sa panagbulag. Si Pablo, ang halangdong apostoles nga mao ang tagsulat sa Bag-ong Tugon, ingon nga si Moises usab sa Daan. Gisulat ni Moises ang mga Balaod ug ang pagpatuman sa mga balaod. Daghan sa mga propeta, nga ang ilang mga pulong giapil ngadto Niini, apan si Moises ang nagsulat sa mga Balaod. Ug gitugotan Mo siya og usa ka sulat, aron magsulat kanila og usa ka sulat-pamatuod sa pangbulag, tungod sa kagahi sa ilang kasingkasing.

<sup>317</sup> Ang halangdong si San Pablo, ingon nga mao’y tagsulat sa Bag-ong Tugon, nakahimo usab og usa ka pahayag, nga, “Nagasulti ako ilalum sa niini nga mga kahintang; ako, dili ang Ginoo.”

<sup>318</sup> Mao man usab karong panahona, Ginoong Dios, sa katapusan sa kalibutan, samtang ania pa kami ilalum sa kalooy sa Dios, ingon nga nanghibalo nga sa dili madugay manubag na kami diha sa Iyang Atubangan. Ug tungod nga daghan Ka na kaayo og gibuhat, Ginoo, sigurado ako, nga sa atubangan niining mga tawo, manghawid gyud sila Niini ingon nga Kini nagagikan Kanimo. Ug aron pamatud-an dinhi karong adlaw, sa daghang mga tawo nga ania dinhi nga nakakita pa gani niadtong Ilhanan didto sa bukid, kon diin ang mga Manulonda sa Ginoo miabot nga anaa sa alimpulos, kon diin miabot kini sa pito ka Manulonda, kon diin gipadayag ang kapadayagan mahitungod sa Pito ka Misteryo; ug ang mao gihapon nga Manulonda, sa mao ra nga direksiyon, sa niadtong mao gihapon nga bukid, kaniadtong adlaw nga Kini gipadayag!

<sup>319</sup> Dios, nagaampo ako nga ang mga tawo managpanguli unta nga mapasalamaton tungod nga gihatagan sila sa Dios niini nga grasya. Gisulti ko lamang Kini, Ginoo, tungod sa pahanugot. Ug ginasulti ko lang Kini tungod sa maong pahanugot, Ginoo. Ug itugot nga ang mga tawo magmapasalamaton kaayo unta nga dili na gayud nila buhaton pag-usab ang ingon niadto nga sala! Ug hinaut nga dili na gayud sila mosulay pa sa pagbuhat og bisan unsa nga sala, kondili higugmaon Ka na sa tibuok nilang kasingkasing. Ginoo, himoa nga magmalipayon kini nga mga

pamilya, ug hinaut nga managtubo sila ug padakuon ang ilang mga anak diha sa pagpahamatngon sa Dios.

<sup>320</sup> Kay, naipahayag ko na man ang akong Mensahe nga anaa sa akong kasingkasing, Ginoo. Gibuhat ko ang tanan-tanan nga nahibaloan kong buhaton. Ug nagpakig-away pa si Satanas kanako sulod sa pipila ka semana, ug mga oras, nga walay tulog. Apan karon ginamando ko Kini, Ginoo, sa niining mga tawo, nga tun-an nila Kini, ug magpadayon ug magkinabuhi alang Kanimo. Itugot kini, Ginoo. Wala na kanako ang maong responsibilidad karon. Sila’y anaa na sa Imong mga kamot. Ginaampo ko nga panalanginan Mo sila.

<sup>321</sup> Panalangini kining mga panyo, Ginoo, nga napahimutang lang dinhi, alang sa mga may sakit ug nagaantus. Hinaut nga unyang gabii mamahimong usa sa pinakamahimayaon, pinakagamhanang mga gabii, nga ang tanang mga tawo mamaayo. Itugot kini, Ginoo. Panalangini kaming tanan.

<sup>322</sup> Hinaut nga managpadayon kami nga may kalinaw, malipayon, og nagakalipay, tungod kay gipakita kanamo sa Dios sa kabuhatan ang “sukad sa sinugdan,” ug gihatagan kami, sa Iyang grasya pag-usab, sa mahugaw namong nahimutangan, sa niining kaulahiing mga adlaw. Oh Gamhanan ug Eternal nga Dios, ginapasalamatan Ka gayud namo tungod niini! Ug hinaut nga magmalipayon gayud ang among mga kasingkasing, nga dili na kami magkaaduna pa og tinguha nga makasala Kanimo. Sa Ngalan ni Jesus. Amen.

I love Him, (Nganong dili man ninyo Siya  
higugmaon?) I love Him  
Because He first loved me  
And purchased my salvation  
On Calvary’s . . .

<sup>323</sup> Ginasulti ko kini karon aron nga masabtan sa mga ministro. Kini’y para lang kanila nga nagasunod niini nga Mensahe!

<sup>324</sup> Oh, malipayon ba kamo? [Nagaingon ang kongregasyon, “Amen.”—Ed.] Gisulti ko na kaninyo ang Kamatuoran, MAO KINI ANG GINAINGON SA GINOO, sukad pa kaniadto! [“Amen!”]

<sup>325</sup> Karon manindog kita ug ipataas ang atong mga kamot, samtang ginaawit nato kini pag-usab, “I love Him.” Gihigugma ko Siya tungod sa Iyang grasya. Gihigugma ko Siya tungod sa Iyang kalooy. Gihigugma ko Siya tungod sa Iyang Pulong. “Ug ang Pulong sa Ginoo miabot sa mga propeta!”

I . . .

<sup>326</sup> Umari ka na, igsoon. Sige.



*KAMINYOON UG PANAGBULAG* CEB65-0221M  
(Marriage And Divorce)

Kining Mensahe ni Igsoong William Marrion Branham, unang giwali sa Ingles niadtong Domingo sa buntag, Pebrero 21, 1965, sa Parkview Junior High School sa Jeffersonville, Indiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2020 VGR, ALL RIGHTS RESERVED

**VOICE OF GOD RECORDINGS**  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)